

IZVJEŠTAJ
O OSTVARENJU CILJEVA I POLITIKE
TUZLANSKOG KANTONA
ZA 2005. GODINU

BUDŽET I FINANSIJE

§ *Postići veći stepen fiskalne konsolidacije i smanjenje visokog nivoa javne potrošnje u odnosu na ostale zemlje u tranziciji u okruženju.*

Poštujući Smjernice, resorno ministarstvo izvršilo je realnu procjenu ukupnih finansijskih resursa, čije je ostvarenje planirano u 2005. godini kroz Budžet Tuzlanskog kantona za 2005. godinu.

Ostvaren je postavljeni cilj planiranih prihoda u 2005. godini, ostvarujući iste ustupanjem sa Jedinственog računa Uprave za indirektno oporezivanje, odnosno ustupanjem od Federacije BiH.

Naime, od 01.01.2005. godine uplata poreza na promet proizvoda i usluga, carina, akciza i putarina vršena je na Jedinственi račun Uprave za indirektno oporezivanje BiH, a zatim prema utvrđenim koeficijentima ustupanje ovih prihoda vršeno je prema entitetima, Brčko Distriktu i Direkciji cesta.

Federacija BiH dio ustupljenih prihoda ustupala je kantonima, a kantoni općinama u skladu sa propisima o pripadnosti javnih prihoda na području kantona i finansiranju kantona .

Resorno ministarstvo je u postupku, odnosno procedurama izvršenja Budžeta Tuzlanskog kantona za 2005. godinu, ostvarilo je transparentno i racionalno korištenje budžetskih sredstava.

Takođe, ostvareno je u potpunosti praćenje izvršenja Budžeta Tuzlanskog kantona za 2005. godinu po svim odobrenim pozicijama, a što će biti prikazano u Izvještaju o izvršenju Budžeta Tuzlanskog kantona za 2005. godinu.

Javna investiranja vršena su u skladu sa procedurama za trošenje tih sredstava. Na osnovu zahtjeva SOR-a za period 2005. - 2007. godina i realnog rasta GDP-a utvrđen je nacrt Budžeta Tuzlanskog kantona za 2006. godinu, a usvajanje Budžeta Tuzlanskog kantona za 2005. godinu očekuje se na godišnjoj sjednici Skupštine Tuzlanskog kantona u decembru 2005. godine.

§ *Uvođenje trezorskog načina poslovanja za Direkciju voda, Direkciju za zaštitu okolice i Agenciju za privatizaciju.*

Uveden je trezorski način poslovanja za Direkcije voda i Direkcija za zaštitu okolice, a za Agenciju za privatizaciju nije uveden trezorski način poslovanja.

§ *Izrada dokumenta o rješavanju unutrašnjeg duga Tuzlanskog kantona.*

Vlada Tuzlanskog kantona utvrdila a Skupština kantona donijela Zakon o utvrđivanju i načinu izmirenja unutaršnjeg duga Tuzlanskog kantona, čime su se stvorile pretpostavke za početak korištenja sredstava ESCROW računa.

§ Uvođenje internih kontrola kod budžetskih korisnika.

Intezivno se radi na izradi i donošenju više akata kojima su utvrđene procedure internih kontrola, procedure trošenja budžetskih sredstava i druge neophodne procedure, a koje su kao nedostaci isticane u nalogima o obavljenoj reviziji finansijskih izvještaja Budžeta Tuzlanskog kantona za predhodne godine.

§ Podrška svim mjerama i aktivnostima koje vode ka rasterećenju privrede.

Sve mjere koje su bile potrebne u toku 2005. godine u oblasti budžeta i finansija a u cilju rasterećenja ili bržeg reogovanja u privredi su u zakonskim okvirima poduzimane od strane resornog ministarstva.

§ Obzirom da će PDV zamijeniti sadašnji režim poreza pratiti sve promjene u odnosu na finansijske efekte po budžet Tuzlanskog kantona.

Vlada Tuzlanskog kantona i resorno ministarstvo su u potpunosti ostvarili postavljeni cilj praćenja promjena i blagovremenog uključivanja u aktivnosti oko reforme poreznog sistema, odnosno uvođenja PDV-a, a sve u odnosu na efekte tih promjena po Budžet Tuzlanskog kantona.

U sklopu navedenih promjena i uvođenja sistema indirektnog oporezivanja, ostvaren je cilj blagovremenog donošenja propisa o načinu ustupanja, odnosno finansiranja općina na području Tuzlanskog kantona iz dijela ustupljenih indirektnih poreza kantonu od strane Federacije BiH.

PRAVOSUĐE I UPRAVA

§ Nastavak reforme pravosudnog sistema kroz osiguravanje autonomije-nezavisnosti sudstva, budžetskim izdvajanjima prema realnim potrebama, uz poštovanje evropskih standarda.

Pravna zaštita građana, djelotvorno sudstvo, djelovanje pravne države i provedba zakona predstavljali su osnovni cilj i politiku u oblasti pravosuđa i uprave u 2005. godini.

Donošenjem Zakona o sudovima Federacije Bosne i Hercegovine ("Sl. novine Federacije BiH" broj: 38/05) okončan je postupak spajanja sudova u Federaciji Bosne i Hercegovine i Tuzlanskog kantona.

Budžetom za 2005.godinu osigurana su i realizirana sredstva koja su bila potrebna za uspješno spajanje sudova, za izmirenje tekućih troškova sudova u 2005. godini, a istovremeno su izmirena i sva su dugovanja sudova iz prethodnih godina u ukupnom iznosu od 1.341.499,00 KM.

Spravom se može konstatovati da su u 2005.godini obezbjeđeni svi preduslovi za normalno funkcionisanje pravosudnih organa i da pitanje neizmirenih troškova za PTT usluge, porotnike, vještake, advokate po službenoj dužnosti, svjedoke i slično, a koja su proteklih godina dodatno opterećavala i usložnjavala rad pravosudnih organa nisu i ne mogu biti nikakav izgovor za eventualne primjedbe na efikasnost i neovisnost u radu tih organa.

§ Reforma javne uprave.

Iako je reforma javne uprave naznačavana kao reforma koja predstavlja jedan od najvećih prioriteta u 2005. godini rezultati na nivou Kantona u mnogome su bili uvjetovani dinamikom provedbe reforme javne uprave na nivou Bosne i Hercegovine i Federacije Bosne i Hercegovine.

Ministarstva i drugi kantonalni organi u toku 2005.godine izradili su i uskladili svoje Pravilnike o unutrašnjoj organizaciji i druge opće akte sa Zakonom o državnoj službi Federacije Bosne i Hercegovine ("Sl. novine Federacije BiH, broj 29/03, 23/04, 39/04). U toku tih aktivnosti, a u skladu sa stavovima Vlade Kantona, izvršena je odgovarajuća manja racionalizacija i smanjenje broja državnih službenika i namještenika, pri čemu se moralo voditi računa o održavanju osnovnih funkcija i nadležnosti kantonalnih organa uprave. Za veće rezultate u tom smislu velika kočnica su bili postojeći i doneseni zakonski propisi, koji su na odgovarajući način zaledili postojeću kadrovsku strukturu uposlenih, bez velikih zakonskih mogućnosti da nadležni organi u tom dijelu nešto bitnije utiču.

Sa Agencijom za državnu službu Federacije Bosne i Hercegovine, a u skladu sa Zakonom, ušlo se u postupak revizije imenovanja i postavljenja dosadašnjih državnih službenika, te u tom smislu očekujemo takođe određene rezultate u dodatnoj racionalizaciji uposlenih, kao i njihovom stručnom i kadrovskom osposobljavanju.

Kako je rješavanje upravnih stvari u upravnom postupku u organima uprave spada u domen "građanskih prava i obaveza" predviđenih Evropskom konvencijom za zaštitu ljudskih prava i osnovnih sloboda, resorno ministarstvo i Vlada Kantona pratili su stanje u oblasti upravnog rješavanja i poduzimali odgovarajuće mjere u cilju pravilne i dosljedne primjene zakona.

U cilju kvalitetnijeg i stručnijeg praćenja stanja u rješavanju zahtjeva i obrazloženja prava stranaka u upravnom postupku resorno ministarstvo izvršilo je postavljenje upravnog inspektora u svom sastavu, te realno očekujemo da će stanje u toj oblasti u narednom periodu biti još kvalitetnije.

§ Rješavanje problema izvršenja sankcija u vezi sa maloljetničkom delikvencijom.

I dalje je prisutan problem nedostatka objekata i lokacije odgovarajućih ustanova za smještaj i stručnu brigu i nadzor nad maloljetnim delikventima.

Shodno zakonskim ovlaštenjima preduzimane su i zakonom predviđene represivne mjere prema učinocima krivičnih djela i prekršaja, uključujući lišavanje slobode i predaju nadležnim pravosudnim organima na dalji postupak.

§ Kadrovsko jačanje i materijalno-tehničko opremanje Kantonalnog pravobraniteljstva s ciljem pravne zaštite imovine i imovinskih interesa Kantona.

U 2005. godini resorno ministarstvo i Vlada Kantona poduzimali su određene mjere da se Kantonalno pravobraniteljstvo kadrovski i materijalno ojača.

U tom cilju imenovan je Kantonalni pravobranitelj, utvrđen broj zamjenika Kantonalnog pravobranitelja. U toku godine, a po osnovu odluka Vlade raspisan je i javni konkurs za popunu pozicija dva zamjenika pravobranitelja, ali je zbog nedovoljnog broja kvalifikovanih kandidata i nemogućnosti izbora taj postupak, iako i sam dugotrajan, obustavljen, te je prije izvjesnog vremena raspisan novi javni

konkurs, koji je u toku, a u okviru koga očekujemo potpuno kadrovsko osposobljavanje i izvršavanje svih funkcija Kantonalnog pravobraniteljstva.

Programom kapitalnih izdataka budžetskih korisnika obezbjeđen je i odobren iznos od 3.000 KM na ime nabavke jednog dijela nedostajuće opreme, a namjera je da se početkom 2006.godine prijemom novih zamjenika, iz istog izvora obezbjede dodatna sredstva za njihovo materijalno opremanje.

U toku su i aktivnosti na iznalaženju adekvatnog poslovnog prostora za smještaj i rad Kantonalnog pravobraniteljstva, po mogućnosti bližeg sjedištu ostalih pravosudnih organa, što bi dodatno uticalo na još efikasniji rad tog organa.

UNUTRAŠNJI POSLOVI I SIGURNOST

§ *Rekonstrukcija policije sa ciljem stvaranja racionalnog i profesionalnog sistema bezbjednosti na nivou države BiH, a time i Tuzlanskog kantona, u saradnji sa Međunarodnom zajednicom i državnim institucijama.*

U organizaciono-funkcionalnom smislu, u toku 2005. godine nastavilo sa implementacijom i dosljednom primjenom Zakona o krivičnom postupku BiH i FBiH, Krivičnih zakona BiH i FBiH, kao i usklađivanje podzakonskih akata iz djelokruga unutrašnjih poslova u cilju implementacije međunarodnih standarda u radu policije.

Tokom godine su, u saradnji sa EUPM-om, kontinuirano vođene i još se vode aktivnosti u pravcu rekonstrukcije policije na državnom nivou.

S tim u vezi, uspješno je izvršena potpuna implementacija preko 50 projekata iz djelokruga rada policije. Izvršene su i određene izmjene u Pravilniku o unutrašnjoj organizaciji, posebno kada se radi o organizaciji i načinu rada kriminalističke policije, kao i usklađivanje Pravilnika sa Zakonom o državnim službenicima.

Resorno ministarstvo je u prethodnom periodu preduzelo sve potrebne mjere i aktivnosti u cilju što adekvatnije pripreme za rekonstrukciju policije na državnom nivou. Međutim, proces rekonstrukcije policije je iz poznatih razloga bio prekinut za određeno vrijeme i biće nastavljen u narednom periodu.

§ *Realizacija osnovnih ciljeva koji proizilaze iz stvarne nadležnosti Ministarstva unutrašnjih poslova, prvenstveno zaštita lične i imovinske sigurnosti građana, boreći se protiv svih oblika kriminala (korupcija, privredni kriminal, trgovina ljudima, narkomanija, maloljetnička delikvencija i imovinski delikti), održavanje što povoljnijeg javnog reda i mira i poboljšanje bezbjednosti u saobraćaju.*

U cilju što bolje i efikasnije zaštite života, lične i imovinske sigurnosti stanovništva na području Tuzlanskog kantona policija je u toku 2005.godine preduzimala zakonom propisane preventivne mjere i aktivnosti, kao što su: prisustvo na terenu; kontinuirano praćenje i analiziranje stanja bezbjednosti; saradnja sa građanima, udruženjima građana, vjerskim i drugim zajednicama; brzo reagovanje policije na poziv građana; kontrola i regulisanje saobraćaja; sprečavanje činjenja krivičnih djela, te dokumentovanje, pronalaženje i hvatanje izvršilaca krivičnih djela i dr.

Osnovni pravci aktivnosti menadžmenta policije bili su usmjereni na kvalitetniju, racionalniju, profesionalniju i efikasniju organizaciju policije, te osiguranje

jednoobraznosti u policijskim operacijama sa aspekta poštivanja i dosljednog sprovođenja zakona.

To je podrazumijevalo koordinaciju mjera i aktivnosti iz djelokruga policijskih uprava i policijskih stanica, neposredno rukovođenje i praćenje realizacije planiranih aktivnosti, ukazivanje na uočene nedostatke i nepravilnosti u radu, te nalažanje mjera za njihovo otklanjanje.

U oblasti kriminaliteta, pored aktivnosti na rasvjetljavanju određenog broja neriješenih težih oblika krivičnih djela iz ranijeg perioda, prioritetni zadaci bili su realizacija Programa borbe protiv korupcije i Programa prevencije bolesti ovisnosti.

Ovim aktivnostima obuhvaćena su krivična djela protiv privrede; organizovanog kriminala, korupcije, crnog tržišta, "pranja novca", poreskih utaja, fiktivnih firmi, proizvodnje, prometa i uživanja opojnih droga, seksualnih delikata, trgovine ljudima i prostitucije, teških razbojničkih krađa i razbojništava, maloljetničkih delikata, rasturanja falsifikovanog novca, otuđenja motornih vozila, falsifikovanja isprava, krvnih delikata i međunarodnog humanitarnog prava, terorizma i drugih krivičnih djela, imajući u vidu da sve veći broj krivičnih djela iz navedenih grupa poprima oblik organizovanog, međukantonalnog, međuentitetskog i internacionalnog kriminala.

Prisustvo organizovanog kriminaliteta na području Tuzlanskog kantona i šire, koji se manifestuje na različite načine kako po vrsti kriminalne radnje, po načinu i sredstvima izvršenja, tako i po načinu i oblicima organizovanja, te po predmetima napada, nametnuo je potrebu intenzivnije borbe protiv svih vidova organizovanog kriminala sa krajnjim ciljem dokumentovanja krivičnih djela protiv privrede, zloupotrebe službene i druge odgovorne dužnosti, suzbijanje i rasvjetljavanje raznih vidova krijumčarenja roba, ljudi, kapitala, oružja, droge, falsifikovanog novca, organizovane prostitucije, "reketa", sive ekonomije (crnog tržišta), poreznih utaja, "pranje novca" i dr.

U borbi protiv organizovanog kriminala, uspostavljena je i funkcioniše veoma dobra i efikasna saradnja sa Kantonalnim Tužilaštvom, Poreskom upravom, Finansijskom policijom i nadležnim inspekcijama. Ove aktivnosti su rezultirale otkrivanjem određenog broja tzv. fiktivnih firmi, razotkriveni su slučajevi poreskih utaja, carinskih prevara i dokumentovanjem drugih krivičnih djela iz oblasti privrednog kriminala.

Kao što je poznato, krivična djela iz oblasti imovinskih delikata čine oko 70% od ukupnog broja učinjenih krivičnih djela na području Kantona.

Najveći broj krivičnih djela učinjenih po nepoznatom učiniocu pripada ovoj grupi krivičnih djela, od kojih se posebno izdvajaju pljačke i razbojništva izvršene nad objektima banaka, pošta, benzinskih pumpi i kladionica, kao i provale u stanove i kuće, otuđenja motornih vozila, i druga krivična djela.

Analiziranjem navedene problematike, razrađene su određene taktičko-tehničke i operativne mjere i radnje, koje su u toku 2005. godine rezultirale razotkrivanjem slučajeva pljački i provala u stanove i kuće, kao i razotkrivanja krivičnih djela otuđenja i pokušaja otuđenja motornih vozila, tako što je otkriveno i razbijeno nekoliko kriminalno-aktivnih grupa koje su se organizovano bavile kriminalnim aktivnostima na širem području Tuzlanskog kantona i susjednim regijama. Određeni broj počinitelaca ovih krivičnih djela je priveden i predat u nadležnost pravosudnim organima.

Kada se radi o maloljetničkoj delikvenciji, Ministarstvo je tokom proteklog perioda, u okviru svog djelokruga rada i nadležnosti, intenziviralo mjere i aktivnosti koje se, prije svega, odnose na preventivno djelovanje, tj. službenici policije MUP-a TK su svojim neposrednim angažovanjem nastojali odvratiti ili spriječiti djecu i omladinu od raznih oblika nezakonitog, neprimjerenog i društveno neprihvatljivog

ponašanja, a povremenim pretresima određenih prostora, objekata i lica, pronalazili i oduzimali nedozvoljena narkotička sredstva, vatreno ili drugo oružje i sl.

Shodno zakonskim ovlaštenjima preduzimate su i zakonom predviđene represivne mjere prema učiniocima krivičnih djela i prekršaja, uključujući lišavanje slobode i predaju nadležnim pravosudnim organima na dalji postupak.

I dalje je prisutan problem nedostatka objekata i odgovarajućih ustanova za smještaj i stručnu brigu i nadzor nad maloljetnim delikventima.

Iako je resorno ministarstvo u toku proteklog perioda uložilo značajne napore u suzbijanje i sprečavanje nelegalne proizvodnje, trgovine i uživanja narkotičkih sredstava, može se uočiti uslozňjavanje ove problematike, koja se ogleda u porastu prisustva opojnih droga na ovim prostorima, porastu broja uživalaca različitih vrsta "lakih" i "teških" droga kao i porastu broja učinjenih krivičnih djela i prekršaja od strane ovisnika.

Ove aktivnosti Ministarstva rezultirale su pronalaskom i oduzimanjem određenih količina narkotičkih sredstava, podnošenju izvještaja o izvršenju krivičnih djela nelegalne proizvodnje, nelegalne trgovine i rasturanja, kao i uživanja narkotičkih sredstava na javnom mjestu, zbog čega je određen broj "diler" droge i drugih lica, učesnika i saučesnika u izvršenju krivičnih djela lišen slobode i predat na dalji postupak pravosudnim organima.

Aktivnosti službenika MUP-a TK po problematici trgovine ljudima i prostitucije na području Tuzlanskog kantona u protekloj godini, rezultirale su smanjenjem ukupnog broja objekata u kojima se organizuje prostitucija a samim tim i slučajeva prostitucije u ugostiteljskim i drugim objektima. S tim u vezi, došlo je i do smanjenja registrovanih slučajeva nelegalnog boravka i nezakonitog zapošljavanja stranaca na području našeg Kantona. Međutim, ovaj vid kriminala nije u potpunosti eliminisan i poprima nove oblike, koji su kompleksniji sa aspekta prikupljanja operativnih informacija i dokaza.

Preventivne i represivne mjere u oblasti javnog reda i mira rezultirale su znatno povoljnijim stanjem u ovoj oblasti nego u prethodnim godinama. Iako je u oblasti bezbjednosti saobraćaja na području Kantona došlo do značajnijeg poboljšanja po mnogim segmentima, koji su rezultat pojačanih aktivnosti policije, ukupna bezbjednosna situacija u ovoj oblasti je još uvijek veoma složena, posebno sa aspekta brojnosti učesnika u saobraćaju i stanja i prohodnosti putnih komunikacija.

U protekloj godini postignut je značajan napredak kada se radi o bezbjednosti povratnika na području Tuzlanskog kantona, što je rezultat unapređenja međusobne saradnje resornog ministarstva i povratničke populacije, posebno kroz aktivnosti „Foruma građana povratnika“.

Uspješno su realizovane sve aktivnosti u vezi obezbjeđenja nesmetanog i bezbjednog odvijanja manifestacije „Srebrenica 2005“. Ministarstvo za unutrašnje poslove Tuzlanskog kantona je bio sjedište operativnog štaba koji je koordinirao i nadzirao planirane aktivnosti vezane za obilježavanje ove manifestacije.

Saradnju Ministarstva unutrašnjih poslova Tuzlanskog kantona sa drugim relevantnim subjektima u cilju osiguranja što bolje ukupne bezbjednosti na području Kantona u toku 2005. godine možemo ocijeniti dobrom, mada bi u pojedinim segmentima mogla i trebala biti znatno bolja. U posmatranom periodu realizovane su planirane i vanredne aktivnosti koje se odnose na rad sa zajednicom.

U toku 2005. godine Ministarstvo unutrašnjih poslova je nastavilo sa pružanjem odgovarajuće pomoći u implementaciji projekta „CIPS“.

Mjere i aktivnosti koje je Ministarstvo unutrašnjih poslova preduzimalo u oblasti zaštite od požara doprinijele su relativno povoljnijoj situaciji sa aspekta

ugroženosti objekata sa izraženim stepenom požarne opasnosti, kao i objekata u kojima boravi ili radi ili se iz bilo kojeg razloga okuplja veći broj lica.

Tokom prvog polugodišta 2005. godine po prvi put su organizovane i sprovedene aktivnosti u vezi obilježavanja Dana policije MUP-a TK, a centralna manifestacije je održana u maju 2005. godine.

§ Podizanje kvaliteta rada kroz materijalno-tehničko opremanje, kadrovsko osposobljavanje i poboljšanje ličnog standarda zaposlenih u policiji.

Pored redovnih, zakonom definisanih poslova i zadataka, u toku 2005. godine, posebne aktivnosti bile su usmjerene na realizaciju budžetskih zahtjeva ovog Ministarstva, u cilju materijalno-tehničkog opremanja službi Ministarstva kroz ispunjenje plana kapitalnih ulaganja, koji je u potpunosti ostvaren.

Nabavljen je planirani broj motornih vozila, specijalnih vozila, uniformi i druge policijske opreme, informatičke opreme, sredstava veze, kancelarijskog namještaja, izvršena je sanacija i adaptiranje određenog broja policijskih objekata, a poboljšan je i materijalno-socijalni status pripadnika ovog Ministarstva.

§ Započeti aktivnosti na pripremi dokumentacije, iznalaženju lokacije i izgradnji dva namjenska objekta policijskih stanica u Tuzli i adaptaciju objekta za Jedinicu za podršku.

Kada se radi o aktivnostima vezanim za pripremu dokumentacije, iznalaženje lokacije i izgradnji dva namjenska objekta policijskih stanica u Tuzli i adaptaciju objekta za Jedinicu za podršku, potrebno je istaći da su ove aktivnosti ostale u fazi inicijative, s obzirom da se u prvoj fazi nije uspjela pronaći adekvatna lokacija za navedene objekte.

Dalje aktivnosti po ovom pitanju su obustavljene zbog nedefinisanog procesa rekonstrukcije policije u pogledu unutrašnje organizacije, broja policijskih stanica, kao i sjedišta same policijske regije.

OBRAZOVANJE, NAUKA, KULTURA I SPORT

§ Reforma obrazovanja je u fokusu aktivnosti za 2005. godinu i to:

- **Institucionalno jačanje i razvoj Univerziteta u Tuzli.**

Institucionalno jačanje Univerziteta u Tuzli omogućilo je ovoj visokoškolskoj ustanovi da bude prepoznatljiva u BiH, naročito u promjenama organizacione strukture, racionalnijeg korištenja raspoloživih resursa (prostor, oprema, kadrovi), inoviranje NPP, međuuniverzitetska i međunarodna saradnja, te realizacija značajnih projekata.

Sve ove aktivnosti približile su Univerzitet u Tuzli modelu evropskog univerziteta, koji je sposoban da se održi pri svakoj transformaciji visokog obrazovanja u BiH.

Iako nije dovršen na državnom nivou Zakon o visokom obrazovanju, u Tuzlanskom kantonu napravljeni su pomaci u pravcu stvaranja pravnog

okvira za primjenu Evropskog kreditnog sistema bodova odnosno implementaciju Bolonjske deklaracije.

Obavljanje naučno-istraživačke djelatnosti ostvaruje se u skladu sa Zakonom o naučno-istraživačkoj djelatnosti. Sa raspoloživim sredstvima, ova djelatnost univerziteta je izuzetno otežana.

Budžetska sredstva u 2005. godini u iznosu od 152.000,00 KM sa pozicije «Nauka» realizovana su za organizaciju i učešće na naučnim skupovima u zemlji i na međunarodnom nivou.

Odobrena su sredstva za sufinansiranje postdiplomskog studija, za izradu i odbranu magisterija i doktorata, a Vlada Tuzlanskog kantona je usvojila predloženi program raspodjele sredstava.

- ***Unapređenje nastavnog procesa u osnovnom i srednjem obrazovanju.***

Unapređenje nastavnog procesa u osnovnom i srednjem obrazovanju je težišna aktivnost reforme obrazovanja. Izvršena je tranzicija osnovnog obrazovanja, prešlo se na uvođenje devetogodišnjeg osnovnog odgoja i obrazovanja, tako da je u školskoj 2005/2006. godini devetogodišnje obrazovanje uređeno na cijelom Kantonu.

Urađeni su NPP za prvu trijadu, za prvi i drugi razred su urađeni novi udžbenici u skladu sa Zajedničkom jezgrom NPP BiH i Okvirnim NPP FBiH.

Za primjenu novih NPP osnovne devetogodišnje škole realizovana je obuka i stručno usavršavanje savjetnika PZ, direktora i pedagoga OŠ i nastavnika koji rade po novom NPP i po metodologiji usmjerenoj na dijete u centru aktivnosti.

U srednjim školama nastavljene su aktivnosti na realizaciji EU-VET programa stručnog obrazovanja i uvođenja modularnog NPP, čija je najbitnija odlika povećanje udjela praktičnog stručnog obrazovanja a smanjenje općeg. Obezbijeđena je i tehnička podrška realizaciji modularnog NPP od strane Evropske unije.

U gimnazijskom obrazovanju urađene su pripreme za potpunu primjenu NPP opće gimnazije i u ovoj školskoj godini prvi put se realizuje EKSTERNA matura u skladu sa Pravilnikom o polaganju maturalnog ispita u gimnaziji.

- ***Povećanje obuhvata djece predškolskim odgojem i obrazovanjem.***

Predškolski odgoj i obrazovanje je u stagnaciji jer prelaskom na devetogodišnje osnovno obrazovanje došlo je do smanjenja broja djece u predškolskim ustanovama.

Zbog teške ekonomske i socijalne situacije, roditelji često nisu u mogućnosti participirati rad predškolskih ustanova.

Općine kao osnivači nisu stvorile uslove za veći obuhvat djece predškolskog uzrasta, naročito u ruralnim sredinama, gdje uopšte ne postoje predškolske ustanove.

Općinska vijeća kao osnivači moraju poštovati zakonska rješenja i donesene Kriterije o radu i finansiranju predškolskih ustanova TK.

Resorno ministarstvo je pružalo pomoć u svim segmentima organizacije i rada javnih predškolskih ustanova.

- ***Daljnja implementacija kampanje za reformu obrazovanja u Tuzlanskom kantonu.***

Projekat «Kampanja za reformu obrazovanja u TK» je uspješno realiziran u četiri ciklusa. Ovaj projekat je finansiran od Fonda otvoreno društvo BiH – Soroš fondacija i značajno je doprinio afirmaciji postignuća naših škola kroz medijsko predstavljanje, edukaciju i stručno usavršavanje i organizaciju smotre kulturno-umjetničkog stvaralaštva učenika osnovnih i srednjih škola.

- ***Implementacija projekta finansiranja osnovnog i srednjeg obrazovanja po učeniku.***

Projekat finansiranja osnovnog i srednjeg obrazovanja po učeniku ima za cilj afirmaciju osnovnih ekonomskih kategorija a prije svega ekonomičnost i učinkovitost i stimulaciju motivacije za štednjom i racionalnije poslovanje.

Mogućnost primjene ovakvog načina finansiranja je uslovljena detaljnom analizom stanja naročito u srednjim školama, te striktnom primjenom pedagoških standarda i normativa koji će dovesti do nužne reorganizacije mreže osnovnih i srednjih škola.

Pokušaj da se načini prvi korak u ovom smislu nije dobio podršku Skupštine TK.

U pripremi je PILOT program koji uključuje 3 osnovne i 3 srednje škole za narednu godinu.

- ***Daljnja implementacija projekta informatizacije ustanova osnovnog i srednjeg obrazovanja.***

Programom kapitalnih ulaganja u 2005. godini za informatizaciju osnovnih i srednjih škola bila su planirana sredstva u iznosu od 180.000,00 KM.

U ovoj godini realizovana su sredstva u iznosu od 80.148,60 KM i za potrebe 18 srednjih škola nabavljeno je 106 računara i 18 štampača, izvršeno je njihovo umrežavanje i omogućen je pristup internetu.

U narednoj godini nastavit će se opremanje ostalih srednjih škola i 40 osnovnih škola

- ***Povećanje efikasnosti rada Pedagoškog zavoda kroz prilagođavanje njegovih funkcija reformama u obrazovnom sistemu u BiH.***

Pedagoški zavod Tuzla, kao stručna upravna ustanova u sastavu Ministarstva u ovoj godini je završila organizacione i tehničke pripreme za prelazak na novi koncept stručnog nadzora ustanova predškolskog, osnovnog i srednjeg obrazovanja.

Urađena je odgovarajuća obuka savjetnika PZ, tako da će svaki savjetnik u PZ biti odgovoran za rad 10 ustanova po teritorijalnom principu.

Nova uloga PZ fokusirana je na stručnu pomoć školama u cilju

angažovanja školskih resursa (mentora i savjetnika) u obavljanju užestručnog nadzora i afirmacija razvojne komponente svake škole kroz timski rad u školi i afirmaciju stručnih aktiva na području jedne ili više opština.

§ *Poboljšanje nivoa tehničke opremljenosti u institucijama kulture.*

Poboljšanju nivoa tehničke opremljenosti u institucijama kulture Vlada i resorno ministarstvo su procijenili da je neophodno da se veći dio sredstava planiranih za kapitalne izdatke uloži u rekonstrukciju i izgradnju objekata kulture na Tuzlanskom kantonu, u čiju svrhu je realizovano značajnih 342.000,00 KM.

Opremanje ustanova kulture u 2005. godini, izvršeno je djelimično iz sredstava vlastitih prihoda, koje ustanove ostvaruju vršeći usluge za treća lica. Poboljšanje uslova rada ostvareno je nabavkom informatičke opreme, neophodnog inventara i druge opreme za operativan rad ustanova.

§ *Priprema prijedloga Programa razvoja kulture na području Tuzlanskog kantona.*

Pripreme projekta Programa razvoja kulture na području Tuzlanskog kantona, Radna verzija Programa u oblasti kulture je urađena i pripremljena za razmatranje na Savjetu za kulturu.

Poslije razmatranja i usvajanja Programa od strane Savjeta, resorno ministarstvo će, kao obrađivač akta, biti u mogućnosti ponuditi konačan materijal.

§ *Podrška i promocija programa «Univerzalne škole sporta» i «Školskog sporta» sa ciljem stvaranja vlastitog takmičarskog kadra.*

U pravcu podizanja vlastitog takmičarskog kadra Ministarstvo obrazovanja, nauke, kulture i sporta dalo je podršku projektu «Univerzalne škole sporta» koja trenutno po programu prihvata oko 300 djece. Održava se na 5 punktova na Tuzlanskom kantonu, u Tuzli, Lukavcu, Srebreniku, Banovićima i Živicama.

Već dvije godine radi se po posebno sačinjenom programu koji je univerzalan za sve polaznike škole uzrasta od 7 – 10 godina. U narednom periodu nastaviti ćemo davati maksimalnu podršku, s obzirom da je ovo pravi način temeljitog rada sa mladima.

Projekat «Školskog sporta» svake godine odvija se kroz dva ciklusa (jesenji i proljetni) i to u šest grana sporta: atletici i plivanju kao i baznim sportovima – košarci, odbojci, stonom tenisu i malom fudbalu. Takmičenja se odvijaju od opštinskog nivoa do federalnog. Kroz ovaj program prođe veliki broj školske omladine.

Da je ovaj projekat opravdao organizaciju rada i pokazao se kao dobar pokazuje i podatak da tuzlanske osnovne i srednje škole kao i pojedinci jesu najbolji na federalnom prvenstvu u atletici, košarci, odbojci (u ova 3 sporta održava se federalno prvenstvo). Ubuduće treba nastojati da se prvenstvo osnovnih i srednjih škola proširi na teritoriju cijele Bosne i Hercegovine i sa većim brojem sportova.

§ Sufinansiranje izgradnje, rekonstrukcije i adaptacije objekata u institucijama obrazovanja, nauke, kulture i sporta (kapitalna ulaganja).

Sufinansiranje izgradnje, rekonstrukcije i adaptacije objekata u institucijama obrazovanja, nauke, kulture i sporta (kapitalna ulaganja).

U okviru realizacije kapitalnih izdatakapružena je znatna finansijska pomoć u rekonstrukciji objekata kulture:

JU BKC Kalesija	172.000,00 KM
JU IKC Banovići	60.000,00 KM
JU Narodno pozorište Tuzla	50.000,00 KM
JU BKCTK Tuzla	40.000,00 KM
Ukupno:	322.000,00 KM

Iz kapitalnih investicija izdvojena su sredstva za adaptaciju sljedećih školskih dvorana i školskih igrališta:

Srednjoškolski centar Kalesija
JU OŠ «Dobošnica» Lukavac – sanacija krova sportske dvorane
JU OŠ «Grivice» Banovići – sanacija krova sportske dvorane
JU OŠ «Podorašje» Srebrenik
JU OŠ «Vukovije» Kalesija
JU OŠ «Đurđevik» Živinice
JU MS Elektro-mašinska škola Lukavac – sanacija patosa
JU OŠ «Tušanj» Tuzla – sanacija komplet dvorane

Uz učešće sredstava koje je Vlada izdvajala, sagrađene su nove dvorane na Kantonu i to: u Gračanici, Lukavcu, Živinicama, Srebreniku i Doboj Istoku i zasigurno svaka novoizgrađena i uređena sportska dvorana predstavlja osnovni preduslov za podizanje sporta na veći nivo, i u kvantitativnom i kvalitetnom pogledu.

PROSTORNO UREĐENJE I ZAŠTITA OKOLICE

§ Usvajanje Prostornog plana i stvaranje uslova za njegovu primjenu.

Vlada Tuzlanskog kantona i resorno ministarstvo u okviru aktivnosti usvajanja Prostornog plana i stvaranja uslova za njegovu primjenu intenzivno radili na poslovima pripreme za izradu Prostornog plana.

Navedene aktivnosti su se odvijale u dvije faze:

- Prva faza je realizovana usvajanjem Prostorne osnove od strane Vlade Kantona od 23.11.2005. godine.
- Druga faza je završetak izrade Prednacrtu Prostornog plana Tuzlanskog kantona koji će do kraja decembra biti upućen na razmatranje Vladi Kantona.

S obzirom da se stižu uslovi za početak primjene Prostornog plana preduzete su aktivnosti na formiranju Kantonalnog zavoda za urbanizam i prostorno planiranje koji će vršiti pripreme i praćenje realizacije Prostornog plana.

§ Projektovanje i početak izgradnje kantonalne sanitarne deponije u saradnji sa općinama Tuzlanskog kantona.

U sklopu aktivnosti vezanih za finansijsku podršku projektovanju i početku izgradnje Kantonalne sanitarne deponije ističemo da je za istu izdata okolinska dozvola, te da je u toku procedura izdavanja urbanističke saglasnosti od strane Federalnog Ministarstva prostornog uređenja i zaštite okoliša.

Drugi dio aktivnosti koji se odnosi na projektovanje i izgradnju pristupnog puta za deponiju se realizuje na način da je završen i revidovan projekat pristupnog puta, dobivena urbanistička saglasnost za isti, a Skupština Kantona je navedeni pristupni put proglasila od značaja za Kanton.

Za ove aktivnosti u 2005.godini bila su predviđena sredstva u iznosu od 300.000,00 KM, a koja nisu realizovana.

§ Analiza stanja bespravne gradnje na području Tuzlanskog kantona na osnovu dobijenih podataka od strane općina i donošenje Zakona o uslovima i kriterijima legalizaciji bespravno izgrađenih objekata, koji bi stvorio pravni okvir za općine Tuzlanskog kantona, da u skladu sa prostornim planovima općina, donesu općinske odluke o legalizaciji bespravno sagrađenih objekata, u slučajevima kada legalizacija gradnje neće izazvati troškove za budžete općina, zbog podnošenja odštetnih zahtjeva za slučaj nesolidne gradnje i gradnje na nestabilnom terenu.

S obzirom da je Zakonom o građenju («Službene novine Tuzlanskog kantona», broj: 3/05), predviđena obaveza donošenja propisa kojim će se regulisati bespravna gradnja na području Tuzlanskog kantona, resorno ministarstvo je, na bazi prikupljene dokumentacije, te analize bespravne izgradnje na području Kantona, sačinilo radnu verziju Zakona o uslovima i postupku legalizacije bespravno izgrađenih građevina, koji je Skupština Kantona usvojila u formi nacrtu i uputila u proceduru javne rasprave.

Tim zakonom bi se realizovali uslovi i način legalizacije bespravno izgrađenih građevina na području Tuzlanskog kantona kao i: postupak legalizacije bespravno izgrađenih objekata, troškovi uređenja građevinskog zemljišta, izrada planova, evidencija bespravno izgrađenih građevina, javnost provođenja postupka legalizacije i sl.

Napominjemo da smo, prilikom izrade Prostornog plana Tuzlanskog kantona, imali u vidu aspekt bespravne izgradnje, te smo nastojali što veći broj tako izgrađenih objekata uklopiti u Prostorni plan Kantona.

§ Finansijska podrška izradi i realizaciji Programa istraživanja podizanja nivoa podzemne vode u masivu na području sa nekontrolisanim izluživanjem soli u cilju obustave eksploatacije na sonim bunarima na Trnovcu i Hukalu, sa posebnim akcentom na program monitoringa koji uključuje monitoring površine terena, monitoring podzemne vode i monitoring hemijskog sastava podzemene vode i slanice,

Ovaj dio aktivnosti je realizovan na način da je finansijski podržan navedeni projekat sredstvima u iznosu od 135.648,51 KM, koja su i realizovana uz još 50.000,00 KM, odobrenih a nerealizovanih sredstava.

§ Podrška projektima kvalitetnije opremljenosti, za veći obuhvat organizovanog odvoza komunalnog otpada u općinama Tuzlanskog kantona i projektima kvalitetnijeg transporta komunalnog otpada do deponija otpada u koordinaciji sa općinama. U saradnji sa općinama riješiti pitanje čišćenja putnih pojaseva i vodotoka od komunalnog otpada.

U okviru strategije uređenja Tuzlanskog kantona predviđene aktivnosti, koje se odnose na pružanje potpore u nabavci vozila i kontejnera za odvoz i prikupljanje komunalnog otpada su u toku, uz napomenu da su kontinuirano vođene aktivnosti na čišćenju i uređenju prostora Kantona.

§ Nastaviti sa podrškom projektima toplifikacije u općinama Tuzlanskog kantona u skladu sa opredjeljenjima općina.

U okviru podrške projektima toplifikacije u općinama Tuzlanskog kantona, navedeni projekti su podržani tako što je finansiran dio projekta toplifikacije Tuzle, u iznosu od 240.000,00 KM, a isto je učinjeno i za općinu Gračanica u kojoj treba, tokom decembra, biti realizovano 150.000,00 KM finansijske podrške.

§ Nastaviti sa realizacijom projekta deminiranje doline rijeke Spreče.

Krajem 2004. godine Vlada Tuzlanskog kantona je u saradnji sa UG «Fenix» pokrenula Projekat deminiranja korita rijeke Spreče. Planom rada za 2005. godinu su predviđena sredstva za nastavak ovog projekta u iznosu od 110.000,00 KM. Realizacija ovog projekta je uvjetovana da UG «Fenix» obezbijedi dodatni dio sredstava.

U toku ove godine završene su sve potrebne pred radnje (projektna dokumentacija nadležne državne ustanove, tender za izbor najpovoljnijeg ponuđača proveden od strane općine Gračanica) za realizaciju dijela program trajnog obilježavanja minskih polja na području općine Gračanica.

§ Poboljšanje kvaliteta okolice, odnosno približavanje europskim standardima u ovoj oblasti, stvaranjem adekvatnog pravnog okvira, inspekcijskim nadzorom i poduzimanjem konkretnih mjera u ovoj oblasti.

Definiranim ciljem u oblasti zaštite okolice, imajući prije svega u vidu trenutno stanje kvaliteta okolice na području Kantona kao i nepotpunu zakonsku regulativu kojom se uređuje oblast zaštite okolice, bilo je planirano da se u sklopu ovog cilja realiziraju slijedeće osnovne aktivnosti:

- § usklađivanje zakonskih akata Kantona sa Federalnim zakonima i donošenje nedostajuće zakonske regulative i provedbenih propisa (uredbi, odluka, pravilnika, upustava i dr.),
- § priprema za donošenje kantonalnih planova zaštite okolice, zaštite zraka i upravljanja otpadom u vidu obezbjeđivanja podloga i podataka (u postupanju sa komunalnim otpadom, u postupanju sa industrijskim neopasnim i opasnim

- otpadom, utvrđivanju većih izvora emisija u zrak, za akcidentna stanja u okolici i dr.),
- § vođenje upravnog postupka za izdavanje okolinskih dozvola u skladu sa novim okolišnim propisima,
 - § pojačani inspekcijski nadzor u oblasti poštivanja propisa, standarda i normi u oblasti zaštite okolice i
 - § proširenje postojećeg Sistema za praćenje kvaliteta zraka na području Tuzlanskog kantona.

Set zakona za oblast zaštite okolice (iz 2003.godine) i dio provedbenih propisa koji je donesen (početkom ove godine) na osnovu tih zakona na nivou Federacije Bosne i Hercegovine, omogućio je prihvatanje i uvođenje novog modela upravljanja okolicom koji se utemelji na savremenim evropskim standardima, uz djelomično uvažavanje složene ustavno-pravne, socio-ekonomske i drugih realnosti naše zemlje.

U skladu sa novodonesenim zakonskim propisima na nivou Federacije BiH, Ministarstvo je većim dijelom realiziralo planirane ciljeve u oblasti zaštite okolice, provođenjem slijedećih aktivnosti:

- (1) U dijelu zakonske regulative i provedbenih propisa doneseni su:
 - § Pravilnik o izdavanju okolinske dozvole za pogone i postrojenja i druge planirane aktivnosti koje mogu značajno uticati na okolicu,
 - § Plan interventnih mjera u slučajevima prekomjernog zagađivanja zraka (SMOG-a),
 - § Uputstvo o načinu obrade i načinu informiranja javnosti o podacima iz kantonalnog Sistema za praćenje kvaliteta zraka na području Tuzlanskog kantona.

Jedan dio planiranih propisa isključivo nije donesen iz razloga što na nivou Federacije BiH još uvijek nisu doneseni potrebni provedbeni propisi, posebno kada se radi o standardima i normativima u oblasti zaštite zraka i upravljanja otpadom.

- (2) Planirane aktivnosti koje se odnose prikupljanje podloga i podataka potrebnih za početak rada na izradi kantonalnih planova zaštite okolice, zaštite zraka i upravljanja otpadom nisu odrađene u planiranom obimu, takođe zbog nedonošenja potrebnih dokumenata i propisa na nivou Federacije BiH, kao Strategije zaštite okolice, Strategije zaštite zraka i Strategije upravljanja otpadom na nivou Federacije BiH i potrebnih upustava za izradu planova.
- (3) Donošenjem kantonalnog Pravilnika o izdavanju okolinske dozvole za pogone postrojenja i druge planirane aktivnosti koje mogu značajno uticati na okolicu, uveden je novi pristup u upravnom postupku za izdavanje okolinskih dozvola u skladu sa novim okolišnim propisima.
- (4) U skladu sa donesenim setom okolinskih zakona i dijelom donesenih provedbenih propisa, otpočelo se i sa promjenama u inspekcijskom nadzoru poštivanja propisa, standarda i normi u oblasti zaštite okolice. Treba naglasiti da je u inspekcijskom nadzoru konstatiran problem kada je u pitanju nadzor nad „većim“ zagađivačima okolice, koji su u skladu sa propisima isključivo u nadaležnosti Inspekcijskog nadzora na nivou Federacije BiH.
- (5) Doprinos poboljšanju kvaliteta okolice na području Tuzlanskog kantona ostvaren je i proširenjem postojećeg Sistema za praćenje kvaliteta zraka na području Tuzlanskog kantona, nabavkom Mobilne imisione stanice za praćenje kvaliteta zraka, kojom se pruža mogućnost da se po potrebi na čitavom prostoru Kantona može vršiti praćenje kvaliteta zraka.

INDUSTRIJA, ENERGETIKA I RUDARSTVO

§ U oblasti hemijske i bazne industrije potrebno je mnoge kapacitete podvrgnuti tehničko-tehnološkoj revitalizaciji i prilagođavanju tržišnim uslovima poslovanja, te zajedno sa menadžmentom, ekspertnim timovima Univerziteta u Tuzli i instituta uraditi programe proširenja djelatnosti i optimalizacije postojeće proizvodnje.

Jedan od ciljeva Vlade Tuzlanskog kantona i resornog ministarstva bio je da se u oblasti hemijske i bazne industrije izvrši tehničko-tehnološku revitalizaciju i prilagođavanje tržišnim uslovima poslovanja, te zajedno sa menadžmentom, ekspertnim timovima Univerziteta u Tuzli i Instituta, uradi program proširenja djelatnosti i optimalizacije u proizvodnji.

U 2005. godini nastavljen je proces revitalizacije procesa proizvodnje soda uz stalno prilagođavanje tržišnim uslovima poslovanja na veoma dinamičnom i specifičnom tržištu u ovoj oblasti poslovanja.

- **Fabrika sode Lukavac – proširenje i povećanje kapaciteta proizvodnje sode bikarbone, hidratnog kreča i asortimana široke potrošnje.**

Proces tehničko-tehnološke revitalizacije i veoma teškog povratka na tržište, baziran na osmišljavanju i urađenom «Projektu za rekonstrukciju i pokretanju proizvodnje u Fabrici sode Lukavac 500 t/dan» iz 2003.godine, sa generalnim remontom i pokretanjem proizvodnje 15.11.2003.godine, ima stalnu uzlaznu liniju do danas.

Za 2005.godinu se može sa sigurnošću ocijeniti da je obezbijeđeno tržište za plasman 15.000 t /mjesečno gotovog proizvoda sa odgovarajućim vrlo prihvatljivim i ostvarivim kapacitetom od 500t/ dan.

Takav trend čini realnim planiranje razvojne komponente u 2006.godini za povećanje kapaciteta i osvajanje profitabilne strukture proizvoda (hidratni kreč, asortiman proizvoda široke potrošnje, konkretizacije uslova proizvodnju «teške sode» i drugo), za koje u ovom periodu nije bilo dovoljno sredstava za njihovu realizaciju.

Hronični nedostatak obrtnih sredstava uz izrazit rast cijena svih energenata (ugljevi, koks, električna energija, mazut), bili su čitavo ovo vrijeme realizacije «projekta» limit za postizanje profitabilnijih poslovnih rezultata.

- **Global ISPAT koksna industrija Lukavac sa strateškim partnerom– uvođenje novih tehnika i tehnologija u proizvodnju sintetskih gasova za proizvodnju vještačkog gnojiva, proizvodnju AMK-e, sirovog katrana, te drugih djelatnosti za koje postoje raspoloživi resursi.**

Kada je u pitanju Koksno hemijski kombinat Lukavac, bazna revitalizacija postrojenja uz integralno pokretanje proizvodnje definisano je potpisanim Ugovorom o pristupanju strateškog investitora dana 10.11.2003. godine.

Strateški investitor «Global Infrastructure Holdings LTD», uložio je shodno navedenom ugovoru, sredstva u dovršetak V koksne baterije koja je zvanično puštena u proizvodnju u julu 2004. godine.

Sva postrojenja koja su tehnološki vezana za proces koksovanja takođe su revitalizirana, a proizvodnja je pokrenuta. U ovom periodu ostvareno je integralno pokretanje fabrika ali bez kontinuiranog rada. Fabrika «Azotara» pokrenuta je na bazi uvoznog amonijaka zbog nemogućnosti revitalizacije pogona «sinteze» za koji nije bilo uslova za revitalizaciju. Ove aktivnosti bile su planirane za 2005. godinu.

Činjenica je, da bi proizvodi zasnovani na domaćem amonijaku, bili znatno konkurentniji po svim osnovama, proizvodima ove vrste koji su prisutni na BiH tržištu.

Takođe, zbog većeg plasmana, ostvario bi se veći kontinuitet u proizvodnji. Ovaj cilj nije realizovan zbog stanja u kome se našlo društvo GIKIL u 2005. godini. Naime došlo je do poremećaja u cijenama ugljeva za koksovanje i koksa. Može se reći da je došlo do izjednačavanja cijena koksa i cijena ugljeva za koksovanje, a neki ugljevi zbog neophodne ranije nabavke su bili skuplji od koksa. Ovakvo apsurdno stanje izazvali su svjetski proizvođači koksa koji imaju sopstvene rudnike uglja za koksovanje sa ciljem gašenja svih ostalih koji nemaju ovakav tehnološki – dohodovni lanac.

Stanje u kojem se iz ovih razloga našlo društvo GIKIL bilo je prinuđeno na smanjenje proizvodnje do tehnološkog minimuma, a sve u cilju što manje ostvarenog gubitka. Sve investicije zasnovane na ostatku dohotka nisu se mogle realizovati.

U cilju povećanja profitabilnosti u proizvodnji Anhidrida maleinske kiseline, u četvrtom tromjesečju 2005.godine, počele se sa rekonstrukcijom pogona radi zamjene benzola sa propan-butan gasom kao sirovinom. Završetak ove investicije, zasnovane na kreditnoj osnovi, očekuje se u prvoj polovini 2006. godine.

- **Potpuna realizacija Programa pokretanja organskog dijela proizvodnog programa u "Polihem u stečaju".**

Pokretanje stečajnog postupka u «Polihem» Tuzla, od samog pokretanja predstavljao je veliku dilemu u opredjeljenju u kom pravcu voditi ovaj proces. Neizvjesnost je povećavana činjenicom samog značaja ovog društva na kompletna privredna zbivanja u Tuzlanskom kantonu i velikog broja zaposlenih radnika sa jedne strane, i potrebnog velikog ulaganja sa neizvjesnim ishodom kada je u pitanju tržišna pozicija društva, sa druge strane. U svemu tome, opredjeljenje stečajnih organa bilo je da se stečajni postupak vodi preko revitalizacije opreme i pokretanja proizvodnje, u prvom redu iz organskog proizvodnog programa.

Revitalizacija opreme, uz finasijsku pomoć Vlade Tuzlanskog kantona, uspješno je završena tako da je uspostavljena proizvodnja u 2005. godini u dijelu organskog proizvodnog programa. Ukupno ostvareni prihod ovog društva za 8 mjeseci je 7,8 miliona KM uz zapošljavanje 246 radnika.

- **Prestrukturiranje "Dita" Tuzla i "Fabrike Soli" Tuzla s ciljem ekonomske održivosti, modernizacije i osiguranja izvoznog tržišta, te traženje strateškog partnera.**

Jedan od ciljeva bio je restrukturiranje i iznalaženje strateškog partnera fabrikama «Dita» i »Solana». Ovaj cilj je djelimično realizovan i to u dijelu koji se odnosi na fabriku «Dita». Naime, menadžment «Dite» uz podršku kantonalnog i federalnog resonog ministarstva, učinio je dosta na polju ograničavanja prekomjernog uvoza sredstava za pranje i čišćenje. Ovaj posao nije do kraja završen, ali stvoreni su realni uslovi za završetak. Završeni posao od strane ovog društva, može da posluži kao putokaz za ostala društva kojima Zakon o slobodnom uvozu ograničava poslovanje i daljnji razvoj. Ovo društvo, prepoznao je strateški partner «LORA» iz Sarajeva, koji je preuzeo sve obaveze iz ugovora o privatizaciji 51% državnog kapitala, uz preuzimanje i izmirenje svih obaveza društva. Za vrlo kratak vremenski period ispunjene su sve preuzete obaveze uz 100% povećanje proizvodnje. Prema procjenama strateškog partnera, društvo će u prvom tromjesječju 2006. Godine, postati ekonomski samoodrživo uz poslovanje na savremenim ekonomskim principima.

U fabrici «Solana» planirana predviđanja nisu ostvarena. U 2005. godini akcenat je dat na iznalaženje strateškog investitora koji bi uložio u revitalizaciju i osavremenjavanje procesa proizvodnje kao i u proširenje tržišta. Razgovori su vođeni sa Austrijskim Salinenom, ali zbog čvrstih stavova i zahtjeva nije postignut dogovor. Prema nezvaničnim informacijama ovaj strateški investitor zainteresovan je za izgradnju fabrike soli na drugoj lokaciji uz dobivanje koncesije na eksploataciju slane vode.

Zbog prezauzetosti operativnim poslovima svih zainteresovanih struktura i zbog nedostatka sredstava nije se radilo na izradi programa iz oblasti proizvodnje malotonažne hemije kojima bi upotpunili postojeće programe.

Zbog značaja ovih programa sa aspekta upošljavanja, boljeg iskorištenja postojećih resursa, popravljavanja finansijskih rezultata, kao i popravljavanje spoljnotrgovinske razmjene neophodno je u narednom periodu iznaći načina za njihovu realizaciju

- **Izraditi određen broj programa iz oblasti proizvodnje malotonažne hemije, proizvodnju opreme kao i iz domena pružanja usluga s ciljem novog zapošljavanja.**

Zbog prezauzetosti operativnim poslovima svih zainteresovanih struktura i zbog nedostatka sredstava nije se radilo na izradi programa iz oblasti proizvodnje malotonažne hemije kojima bi upotpunili postojeće programe. Zbog značaja ovih programa sa aspekta upošljavanja, boljeg iskorištenja postojećih resursa, popravljavanja finansijskih rezultata, kao i popravljavanje spoljnotrgovinske razmjene neophodno je u narednom periodu iznaći načina za njihovu realizaciju

§ Metaloprerađivačku i elektro industriju reorganizirati i time podići ovu granu na samoodrživi nivo:

- Razvijati mala i srednja preduzeća, pri čemu dati prioritet novim oblicima i koncepcijama organizacije rada.
- Stvaranje uslova za stabilizaciju proizvodnje i reorganizaciju u Tvornici transportnih uređaja Tuzla.

Metaloprerađivačka i elektroindustrija u 2005. godini zabilježila je najveći iskorak u poslijeratnom periodu. U prvih 6 mjeseci 2005. godine ukupan prihod povećan je za 2,44 puta kao i izvoz za 2,71 puta u odnosu na isti period 2004. godine.

Posebne aktivnosti vođene su na oživljavanju proizvodnje u TTU Tuzla i »Livnici čelika» Tuzla, gdje se vode sudski sporovi oko neuspjele privatizacije ovih preduzeća.

Za proizvodima ovih privrednih društava zainteresovani su ino partneri, pa je i to bio jedan od razloga u finansijskoj pomoći Vlade TK i uvezivanju ova dva društva oko proizvodnje zajedničkih proizvoda.

§ Strateški cilj tekstilne i obučarske industrije Tuzlanskog kantona je opstanak ekonomski opravdanih kapaciteta kroz restrukturiranje ovih kapaciteta, primjenu modernih tehnoloških, ekonomskih, organizacionih te ekoloških standarda i njihovo povezivanje sa stranim partnerima.

Privredna društva iz grane tekstila i obuće ostvarila su manji ukupan prihod u odnosu na isti period prethodne godine radi iscrpljenosti ovih privrednih društava sa lohn poslovima.

Posebne aktivnosti su vođene sa sindikatom prema Federalnoj Vladi na smanjenju osnovica za poreze i doprinose na plate, i ove aktivnosti su u parlamentarnoj proceduri.

Ministarstvo i Vlada su finansijski pomogli za sada jedino privrednim društvima u ovoj grani koja su sa većinskim državnim kapitalom, Fabriku obuće «Aida» u Tuzli u cilju oživljavanja proizvodnje.

Uvedeni su novi kupci i do kraja godine se očekuje veća uposlenost kapaciteta i stvaranje uslova za prestrukturiranje i pripremu za privatizaciju.

§ U industriji gume, plastike i grafičke djelatnosti izraditi studiju o otkupu, reciklaži i ponovnom vraćanju u proces proizvodnje recikliranih materijala.

Takođe jedan od ciljeva ovog Ministarstva bio je izrada studija o reciklaži sekundarnih sirovina (gume, plastike i papira i željeza). Zbog nedostatka sredstava studija nije urađena. Stanje sa prikupljanjem, a time i sa reciklažom metalnih sekundarnih sirovina, zbog njegove ekonomske isplativosti, zabilježilo je značajne rezultate. Registrirano je nekoliko društava sa osnovnom djelatnošću iz ove oblasti. Nešto slabiji rezultati bilježe se sa prikupljanjem papira, ali su još uvijek na nezadovoljavajućem nivou. Najveći problem predstavlja neiskazani interes za prikupljanjem i reciklažom plastike i gume. Uspostavom regionalnih deponija stvorit će se realniji uslovi za izradom studija o načinu prikupljanja i reciklaža i ovih sekundarnih sirovina.

§ Strateški razvoj industrije građevinskog materijala ostvariti kroz optimalizaciju i modernizaciju postojećih kapaciteta (Siporex, Ingram, Tuzla Kvarc i dr.) te kvalitet roba i usluga uskladiti sa međunarodnim standardima serije ISO 9000 i certifikatima standarda serije ISO 14000 koji su vezani za zaštitu okoline.

Uvođenje standarda kvaliteta roba i usluga kod proizvođača građevinskog materijala bio je jedan od ciljeva za 2005. godinu. Iako realno gledano, ova podgrana industrije bilježi relativno dobre poslovne rezultate, kada je u pitanju uvođenje Evropskih standarda nisu ostvareni zacrtani zadaci za 2005. godinu.

§ Energetsku privredu učiniti efikasnom i time obezbijediti osnovu za nesmetan rad i potreban nivo industrijskog i društveno-ekonomskog razvoja Tuzlanskog kantona, a u skladu sa akcijskim planom FBiH za prestrukturiranje i privatizaciju energetskog sektora u BiH.

Krajem 2003.godine Vlada i Parlament FBiH usvojili su Akcioni plan FBiH za prestrukturiranje i privatizaciju elektroenergetskog sektora u BiH. Ovom Planu predhodila je Studija stranog konsultanta o prestrukturiranju elektroenergetskog sektora BiH sponzorirana od strane USAID-a.

Akcionim planom definisani su rokovi i odgovornosti za sprovođenje utvrđenih ciljeva. Koji nažalost kasni. Formiranje novih društava nije ni počelo. Rudnici uglja opterećeni su velikim problemima koje ne mogu sami riješiti. Iz Federalnog ministarstva energetike, rudarstva i industrije, kao titulara državnog vlasništva, nema inicijativa za početak planiranih procesa. Početne pozicije budućih pregovarača su različite i treba ih približavati kako bi započeo proces restrukturiranja. Nedostaju socijalni programi za zbrinjavanje viška zaposlenih. Rudnici nisu u stanju sami riješiti zbrinjavanje velikog broja invalida rada i rata.

Zakonom o električnoj energiji definisana je nadležnost regulatornih tijela za regulaciju tarifa. Regulatorna komisija za električnu energiju FBiH (FERK), usvojila je Pravilnik za tarifnu metodologiju i tarifne postupke. Ovim pravilnikom propisane su osnove procedura za razmatranje zahtjeva i svih drugih dokumenata za odobrenje tarifa, koji su neophodni kako bi FERK ispunio obaveze u skladu sa Zakonom o električnoj energiji.

Proizvodnja i isporuka električne energije je kapitalno intenzivno poslovanje sa dugim trajanjem sredstava rada (20 do 30 godina) koja kroz tarife treba valorizovati i omogućiti stabilan tok prihoda.

§ Strateški cilj u oblasti rudarstva je zaustavljanje kompletne eksploatacije soli i slane vode sa užeg gradskog područja i izmještanje eksploatacije na područje Majevice - Rudnik soli "Tetima".

Privredna društva iz oblasti rudarstva, Rudnik krečnjaka "Vijenac" i Rudnik soli "Tušanj" u toku 2005. godine uspijevali su, i pored teškoća sa kojima su se susretali, obezbijediti dovoljne količine kamena krečnjaka i industrijske slance za potrebe hemijske industrije Tuzlanskog kantona. Resorno ministarstvo je putem Vlade Tuzlanskog kantona pružalo finansijsku pomoć ovim privrednim društvima, kao pomoć radnicima angažovanim u procesu proizvodnje, kako bi se bar donekle ublažili problemi, nastali prvenstveno dotrajalom mehanizacijom i nemogućnosti redvne naplate svojih potraživanja.

U rudnicima uglja bilježi se stalni porast mjesečne i godišnje proizvodnje, a uporedo se vode intenzivne aktivnosti vezano za provođenje Akcionog plana prestrukturiranja rudnika uglja koji je donijela Vlada Federacije BiH. Resorno ministarstvo, iako nema nadležnost nad rudnicima uglja, uključeno je u ove aktivnosti kroz razgovore sa menadžmentom i učestvovanje na naučnim savjetovanjima sa ovom tematikom.

Eksploatacija soli i slanice sa užeg gradskog područja još nije u potpunosti zaustavljena, ali je proizvodnja na sonim bunarima, u odnosu na 2004. godinu smanjena za 50%.

Razlog zašto proizvodnja nije u potpunosti obustavljena je izrada tehničke dokumentacije, čija izrada je u toku, pa se početak zaustavljanja rada sonih bunara očekuje u prvoj polovini 2006. godine.

Na Rudniku "Tetima" urađena je jedna istražno-eksploataciona bušotina, koja će u junu 2006. godine moći da obezbijedi dodatnih 50 m³/h industrijske slanice, što će obezbijediti potrebnih 200 m³/h slane vode za sve potrošače.

§ Istražiti mogućnost optimalne finalizacije rezervi kvarcnog pijeska, krečnjaka i magnezita, uz sagledavanje stepena iskorištenosti nemetalnih sirovina na prostoru Tuzlanskog kantona.

Razvoj industrije finalnih proizvoda na bazi kvarcnog pijeska, krečnjaka i magnezita, iako postoje razrađena idejna rješenja, nije ostvaren zbog nedostatka sredstava. Za Rudnik magnezita još uvijek nije pronađen strateški partner, niti je pokrenuta proizvodnja u ovom rudniku.

§ Nastaviti proces provjere ispunjavanja obaveza po ugovorima o prodaji državnog kapitala, te u slučajevima gdje se obaveze ne ispunjavaju, a ne dobiju se garancije za njihovo ispunjavanje, ući u proces raskidanja ugovora.

Proces provjere ispunjenja obaveza po ugovorima o privatizaciji je jedna od redovih aktivnosti Agencije za privatizaciju. Kontrola je izvršavana u skladu sa Uputstvom o obavljanju kontrole izvršenja obaveza iz kupoprodajnih ugovora u postupku privatizacije u Federaciji ("Sl. Novine F BiH" broj 14 od 08.04.2003. godine), Pravilnikom o obavljanju kontrole izvršenja obaveza iz kupoprodajnih ugovora u postupku privatizacije u Federaciji BiH ("Sl. Novine F BiH" broj 12 od 03.03.2005 godine), te Zaključkom Skupštine Tuzlanskog kantona usvojenim na sjednici od 29.11.2003. godine.

U svim privatizovanim preduzećima čiji ugovori nisu ispunjeni sa aspekta vremenskog trajanja, vršene su komisijske kontrole svakih šest mjeseci. Na neispunjenje ugovorenih obaveza kupci su upozorovani od strane komisije, ali i pozivani u Agenciju na sveobuhvatnije razgovore.

Najviše problema odnosi se na stavku ulaganja i to tamo gdje su radnici kupci društva. Ulaganja su vršena iz tekućeg poslovanja društva, a ne od strane kupaca, kao i na nova upošljavanja gdje društva posluje sa gubitkom.

Velikih poteškoća ima i kod izmirenja zaostalih obaveza po osnovu PIO-a i zdravstvenog osiguranja, te velikih preuzetih obaveza prije privatizacije preduzeća.

Zbog neispunjenja ugovorenih obaveza u toku je ranije pokrenut postupak raskida ugovora za preduzeće "Livnica čelika" Tuzla.

§ Potpisati ugovore o dodjeli koncesija na period od pet godina sa privrednim društvima koja su do sada koristila javna dobra za obavljanje svoje djelatnosti.

U toku 2005. godine zaključena su tri koncesiona ugovora za eksploataciju kamena krečnjaka sa privrednim društvima koja već koriste javna dobra, dobivena je saglasnost Vlade Tuzlanskog kantona na tekst još dva ugovora, i potpisivanje se očekuje do kraja mjeseca. Do kraja godine se očekuje zaključivanje i drugih ugovora, između ostalog i ugovora za eksploataciju uglja.

§ Sačiniti Dokument o dodjeli koncesija na Tuzlanskom kantonu.

Ove godine, u julu mjesecu, imenovana je Komisija za koncesije Tuzlanskog kantona u čijoj nadležnosti je izrada Dokumenta o politici dodjele koncesija. Resorno ministarstvo je sačinilo radni materijal sa eventualnim predmetima koncesije iz resorne oblasti i isti dostavilo Komisiji za koncesije.

OBNOVA, RAZVOJ I POVRATAK

§ *Praćenje prioriternih projekata koji su ušli u Program javnih investicija od 2005. do 2007. godine.*

Realizovani su projekti u ukupnom iznosu od cca 10.230.000. KM, a očekuje se da će do kraja godine isti biti realizovani u iznosu od cca 15 miliona KM.

§ *Inoviranje Strategije razvoja Tuzlanskog kantona.*

Praćenje procesa izrade Srednjoročne razvojne strategije BiH (PRSP) u periodu 2004 - 2007. godine i učešće u realizaciji akcionog plana predviđenog za taj period. Vlada Kantona je obezbijedila nastavak aktivnosti na izradi razvojne strategije Kantona, koje je u prethodnom sazivu Vlade pokrenuta i vodjena u saradnji sa EU odnosno organizacijom GTZ. Finansirajući rad Regionalne razvojne agencije Vlada Kantona je obezbijedila kontinuitet aktivnosti proizašle iz tog koncepta strategije razvoja Kantona odnosno regije.

U sklopu aktivnosti na realizaciji Srednjoročne razvojne strategije, značajno je učešće Vlade Kantona u procesu uspostavljanja i jačanja koordinacionog mehanizma formiranog na nivou Federacije sa ciljem efikasnijeg planiranja utroška javnih prihoda na svim nivoima organizacije, njihovog usmjeravanja na razvojno orijentirane javne projekte, kao i koordinacije tih projekata na različitim nivoima organizacije vlasti.

§ *Pružiti značajniju podršku održivom povratku.*

U ovom dijelu utrošeno je cca 405.000.00 KM od čega na području Tuzlanskog kantona 156.377.00, a Republike Srpske 248.377.00 KM.

Na području Kantona i Republike Srpske sredstva su utrošena na ime finansiranja proljetne sjetve, za pomoć povratničkim porodicama, obnovu vjerskih

objekata, kao i rekonstrukcije škole u MZ Seona, na području Kantona, a Republike Srpske na ime učešća u finansiranju proizvodnih pogona u Srebrenici radi zapošljavanja povratnika, kao i poljoprivrednih proizvođača na području Koraja općina Lopare .

§ *Nastaviti reviziju korisnika u kolektivnim centrima i unaprijediti uslove života u istim.*

Kontinuirano se vodila aktivnost na provjeri korisnika alternativnog smještaja na području Kantona u naseljima izgrađenim, rekonstruisanim ili adaptiranim za potrebe raseljenih lica i povratnika, kuća holandske Vlade i subvencioniranih stanarina.

U svim slučajevima u kojima je utvrđeno neosnovano korištenje nekog od navedenih prava došlo je do njegovog ukidanja. Posebno je vršena revizija kuća holandske Vlade koje su neke općine koristile za smještaj socijalne kategorije domicilnog stanovništva, te smo zahtijevali eliminisanje tih pojava.

ZDRAVSTVO

§ *Izrada Strategije razvoja zdravstva na području Tuzlanskog kantona do 2010. godine.*

Ministarstvo zdravstva je u saradnji sa Zavodom za javno zdravstvo TK još u novembru 2004. godine izradilo prednacrt strategije razvoja zdravstva na području Tuzlanskog kantona do 2010. godine.

S obzirom da kanton u skladu sa Zakonom o zdravstvenoj zaštiti ostvaruje svoje zadatke tako da osigurava djelatnost i prava iz člana 9. Zakona i da je funkcionarnim pregledom sektora zdravstva u Bosni i Hercegovini od strane Evropske Komisije predviđena nadležnost kantona u domenu primarne zdravstvene zaštite, prednacrt dokumenta nije upućen u javnu raspravu jer je sadržavao i bolničku zdravstvenu zaštitu za čije uređenje je nadležno Federalno ministarstvo zdravstva.

Istovremeno je za Evropsku Uniju i Svjetsku zdravstvenu organizaciju Projekat «Podrški reformi zdravstvene zaštite» urađen «Nacrt strategije primarne zdravstvene zaštite u Bosni i Hercegovini» u namjeri da se sektor zdravstva uredi na jedinstven način na području cijele države.

§ *Jačanje primarne zdravstvene zaštite na području Tuzlanskog kantona.*

Postojeći sistem zdravstvene zaštite u Bosni i Hercegovini, u okviru kojeg zdravstvene usluge u velikom obimu pružaju ljekari specijalisti, treba zamjeniti integrisanom zdravstvenom zaštitom, koju karakteriše sveobuhvatnost i kontinuitet, te izgradnjom odnosa između davaoca zaštite i populacije koji se bazira na međusobnom povjerenju. U okviru politike «Zdravlje za sve u 21 stoljeću» Svjetska zdravstvena organizacija utvrdila je cilj da ljudi u regiji treba da imaju pristup primarnoj zdravstvenoj zaštiti orijentiranoj ka porodici i zajednici, koju podržava fleksibilan i odgovarajući sistem bolnica.

Ovaj model vodi ekonomičnijoj, efikasnijoj, više koordiniranoj i kontinuiranoj zdravstvenoj zaštiti zbog čega je Ministarstvo zdravstva aktivno uključeno u realizaciju projekta porodične medicine na području Tuzlanskog kantona i sa Zavodom zdravstvenog osiguranja dalo značajnu podršku implementaciji Projekta. Pilot projekat «Osnovno zdravstvo», u okviru kojeg se najviše radilo na implementaciji porodične medicine, završen je 30. juna 2004. godine. Projekat je pilotiran u tri kantona ali se može konstatovati da je implementacija projekta bila najuspješnija na području Tuzlanskog kantona.

Projekat Jačanje zdravstvenog sektora je aktivnost koja se provodi na području cijele Federacije Bosne i Hercegovine i implementirat će se na 10 kantona i prihvaćen je od Vlade Federacije BiH i Borda Svjetske banke.

Projekat je aktivan od 15 jula 2005.godine, a resorno ministarstvo je u saradnji sa Federalnim ministarstvom zdravstva sačinilo Operativni plan implementacije porodične medicine na području Tuzlanskog kantona koji bi se trebao realizovati do 31.06.2009.godine. Predviđeno je da se ovaj projekat sufinansira sredstavima iz budžeta kantona i to je Vlada Tuzlanskog kantona prihvatila 23.05.2005.godine.

§ Unaprijediti zaštitu zdravlja ljudi kroz realizaciju Preventivnih programa zaštite stanovništva Tuzlanskog kantona za 2005. godinu.

Analiza zdravstvenog stanja stanovništva Tuzlanskog kantona i indikatori zdravlja za 2004. godinu sa prijedlogom mjera, koju je izradilo resorno ministarstvo koristeći podatke Zavoda za javno zdravstvo Tuzlanskog kantona poslužila je kao osnov za pripremu i odabir prioriternih preventivnih programa koji će se realizirati planiranim sredstvima iz obaveznog zdravstvenog osiguranja u 2005. godini.

Na osnovu zaključaka i prijedloga mjera iz Analize, posredstvom Zavoda će se realizovati četiri projekta u 2005. godini, a nastavak preventivnih aktivnosti se planira u 2006. godini, sredstvima iz Budžeta Kantona.

Provođenje promotivno preventivnih sadržaja u aktivnom nadzoru nad zdravljem svih populacionih skupina stanovništva, značajno se nameće među predloženim mjerama.

Kako je prevalenca (ukupan broj registrovanih bolesnika) tuberkuloze od 176/100.000 stanovnika Tuzlanskog kantona u 2004. godini, bila dva puta viša od prosječnih stopa u Evropi, stopa oboljevanja od zaraznih bolesti iznosila je 13,63‰, a epidemiološka situacija u 2004. i 2005. godini je bila nesigurna, procijenjeno je da jedan projekat bude iz oblasti prevencije zaraznih bolesti.

Zbog potrebe prevencije oboljenja koja su vodeći uzroci smrti na području Tuzlanskog kantona odobrena su dva projekta oblasti prevencije masovnih nezaraznih bolesti (kardiovaskularne bolesti i Ca dojke), i jedan projekat iz oblasti zaštite zdravlja djece.

Resorno ministarstvo je prihvatilo i dalo saglasnost za realizaciju 4 projekta:

- Prevencija kardiovaskularnih bolesti
- Prevencija karcinoma dojke,
- Neonatalni skrining na kongenitalnu adrenalnu hiperplaziju u Tuzlanskom kantonu
- Detekcija rizika i skrining tuberkuloze,

§ Utvrđivanje mreže zdravstvene djelatnosti primarne zdravstvene zaštite koja podrazumijeva vrstu i kapacitet zdravstvenih ustanova potrebnih za osiguranje zaštite zdravlja građana na području kantona.

Nacrt Odluke o utvrđivanju Mreže zdravstvene djelatnosti i zdravstvenih ustanova primarne zdravstvene zaštite Tuzlanskog kantona, pripremljen je u 2004.godini, i dostavljen u proceduru.

Skupština je usvojila nacrt Odluke o utvrđivanju Mreže zdravstvene djelatnosti i zdravstvenih ustanova primarne zdravstvene zaštite Tuzlanskog kantona, i utvrdila rok za provođenje javne rasprave.

Resorno ministarstvo provelo je javnu raspravu, te zadužilo Komisiju za izradu mreže da razmotri dostavljene primjedbe i prijedloge na Nacrt, te da primjenom izmijenjenih standarda i normativa pripremi Prijedlog Mreže. Komisija je okončala svoj rad i resornom ministarstvu dostavila novi prijedlog 26.10.2005.godine.

Izrada konačnog prijedloga je u toku, i isti će biti dostavljen u proceduru za jednu od narednih sjednica Vlade TK.

§ Finansiranje zdravstvenih ustanova vršiti u skladu sa finansijskim planovima zdravstvenih ustanova koji se moraju izraditi u skladu sa zdravstvenim standardima i započeti pripreme za uvođenje trezorskog poslovanja u Zavodu zdravstvenog osiguranja Tuzlanskog kantona.

U skladu sa Zaključkom Vlade Tuzlanskog kantona i aktom Ministarstva zdravstva Javne zdravstvene ustanove su dostavile Finansijske planove i planove kapitalnih ulaganja za 2005. godinu, koji su većim dijelom usaglašeni sa sredstvima predviđenim za finansiranje usluga neposredne zdravstvene zaštite utvrđenim Finansijskim planom Zavoda zdravstvenog osiguranja.

Rashodi za finansiranje usluga neposredne zdravstvene zaštite planirani su u skladu sa odredbama Odluke o standardima i normativima zdravstvene zaštite iz obaveznog zdravstvenog osiguranja, pripadajućeg broja stanovnika i postojećih mogućnosti ustanova da pruže usluge zdravstvene zaštite.

Finansiranje zdravstvene zaštite stanovništva vršeno je u skladu sa Finansijskim planom zavoda zdravstvenog osiguranja Tuzlanskog kantona

§ Kapitalnu izgradnju u ustanovama zdravstvene zaštite planirati i realizovati za poticaj dijagnostičkog opremanja, u skladu sa potrebama za unapređenjem zdravstvene zaštite stanovništva na Tuzlanskom kantonu, o čemu će odluke donositi Upravni odbor Zavoda zdravstvenog osiguranja Tuzlanskog kantona, a na koje će saglasnost davati Vlada Tuzlanskog kantona.

Resorno ministarstvo je na osnovu analize dostavljenih planova zdravstvenih ustanova, nakon usaglašavanja sa Zavodom zdravstvenog osiguranja Tuzlanskog kantona, donijelo:

- Program prioriternih kapitalnih ulaganja u sektoru zdravstva za 2005.godinu i
- Plan kapitalnih ulaganja Javnih zdravstvenih ustanova Tuzlanskog kantona, na koji je Vlada dala saglasnost.

Realizacija planiranih ulaganja vrši se na teret sredstava zdravstvenih ustanova, koja na ime realizacije programa zdravstvene zaštite osiguranih lica, ostvaruju iz sredstava obaveznog zdravstvenog osiguranja i samo izuzetno na teret ostalih rashoda zdravstvene zaštite, odnosno sredstava rezerve Zavoda zdravstvenog osiguranja.

Program realizuju Javne zdravstvene ustanove Tuzlanskog kantona pod nadzorom i uz saglasnost Ministarstva i Zavoda zdravstvenog osiguranja .

POLJOPRIVREDA, VODOPRIVREDA I ŠUMARSTVO

§ Razvoj primarne poljoprivredne proizvodnje kroz:

- ***poticaje poljoprivredne proizvodnje iz Budžeta Tuzlanskog kantona,***
- ***subvencioniranje kamata za kredite u primarnoj poljoprivrednoj proizvodnji i prehrambenoj industriji,***
- ***podršku razvoju malih i srednjih privrednih subjekata iz oblasti prehrambene i drvne industrije kroz subvencioniranje kamata na kredite,***
- ***realizovanje druge faze uvođenja geoinformacionog sistema za državno poljoprivredno zemljište,***

Sredstva za poticaj u primarnoj poljoprivrednoj proizvodnji na području Tuzlanskog kantona obezbijeđena su iz budžeta Federacije Bosne i Hercegovine u iznosu od 3.582.108,00 KM, a iz budžeta Tuzlanskog kantona u iznosu od 1.000.000,00 KM.

Premirane su slijedeće vrste proizvodnje:

- o svježe kravlje mlijeko u količini od 12.973.759,00l u iznosu od 1.862.366,60 KM,
- o uzgoj pilenki teška roditeljska linija od 25.505,00 kom. u iznosu od 51.010,00 KM,
- o proizvodnja merkantilne pšenice u količini od 1.860.000,00 kg u iznosu od 111.600,00 KM,
- o proizvodnja povrća u količini od 989.773,00 kg u iznosu od 98.977,30 KM,
- o zasnivanje voćnjaka u površini od 231 ha u iznosu od 648.318,18 KM,
- o proizvodnja sirovog duhana u listu roda 2004. godine u količini od 149.583,88 kg u iznosu od 134.625,50 KM .

Do sada je realizirano oko 64% planiranih sredstava za poticaje u primarnoj poljoprivrednoj proizvodnji.

Potrebno je istaći da je realizacija poticaja planirana kvartalno po proizvodnjama, te iz tih razloga planirana sredstva nisu realizirana u cijelosti, a prema podacima o evidentiranoj proizvodnji procjenjuje se da će sva obezbijeđena sredstva biti utrošena.

Pored navedenih sredstava za poticaje, planirana su i sredstva za regresiranje kamata za kredite u poljoprivrednoj proizvodnji iz budžeta Federacije BiH u iznosu od 150.000,00 KM, kao i iz budžeta Tuzlanskog kantona u iznosu od 600.000,00 KM.

U toku ove godine ukupno je realizovano 212 kredita u iznosu od 2.220.000,00 KM. Izdvajanje sredstava za ovu namjenu rezultiralo je povećanjem obima proizvodnje.

Završena je i druga faza uvođenja geoinformacionog sistema za državno poljoprivredno zemljište, kojom su obuhvaćene općine: Kladanj, Banovići, Sapna, Teočak, Čelić, Doboј Istok, Gračanica i Tuzla.

§ *Opremanje laboratorije u Poljoprivrednom zavodu u cilju osposobljavanja za pružanje usluga kontrole kvaliteta zemljišta.*

Opremanje laboratorije u Poljoprivrednom zavodu za pružanje usluga kontrole kvaliteta zemljišta izvršeno je u planiranom obimu, a u planiraju se aktivnosti na osposobljavanju Poljoprivrednog zavoda za proširenje pružanja usluga ove vrste.

§ *Izrada plana i programa mjera zaštite akumulacije "Modrac".*

§ Prijedlogom teksta **Zakona o zaštiti akumulacije "Modrac"** koji je u parlamentarnoj proceduri, članom 12. **Zakona o zaštiti akumulacije "Modrac"** je propisano da će, u cilju poboljšanja i očuvanja površinskih voda u slivu akumulacije, odnosno voda akumulacije, Vlada kantona, na prijedlog Ministarstva, u roku od godinu dana od dana stupanja na snagu Zakona, donijeti Plan i program mjera zaštite akumulacije "Modrac", a koji treba da sadrži:

- cjelovitu ocjenu stanja kvaliteta voda akumulacije i površinskih voda u slivu akumulacije,
- ciljeve zaštite voda akumulacije i površinskih voda u slivu akumulacije,
- program mjera za zaustavljanje trenda pogoršanja kvaliteta površinskih voda gdje je to ozbiljnije narušeno i program mjera za postupno poboljšanje kvaliteta površinskih voda do propisane klase vode,
- plan prioriteta realizacije mjera zaštite po fazama i rokovima,
- metodologiju, plan i program monitoringa kvaliteta površinskih voda u slivu akumulacije, voda akumulacije i otpadnih voda koje se ispuštaju u površinske vode,
- ekonomske poticajne mjere za prioritetne investicije u industriji, u cilju smanjenja nastajanja otpadnih voda,
- potrebna finansijska sredstvaza realizaciju programiranih aktivnosti iz ovog Plana i način obezbjeđenja potrebnih finansijskih sredstava,
- pravce privrednog i urbanog razvoja u slivu akumulacije.

Predviđene aktivnosti prolongirane su dinamikom donošenja Zakona o zaštiti akumulacije "Modrac" i bit će aktuelizirane po njegovom donošenju.

Izrada registra (katastra) svih objekata lociranih u slivu akumulacije "Modrac" i na obalama akumulacije, kao i izrada plana i programa mjera zaštite akumulacije "Modrac", su kao obaveza Ministarstva i Vlade Tuzlanskog kantona u 2005 godini, vezane za donošenje Zakona o zaštiti akumulacije "Modrac", koji još nije prošao skupštinsku proceduru. Samim tim donošenje ovih podzakonskih akata još nije moguće.

§ Unapređenje vodosnabdijevanja u općinama Tuzla, Kalesija i Teočak sufinansiranjem izgradnje postrojenja za proizvodnju pitke vode.

Nosioci aktivnosti na realizaciji projekta izgradnje postrojenja za prečišćavanje vode Cerik – I faza, kapaciteta 300 l/s za potrebe vodosnabdijevanja općine Tuzla, su Općina Tuzla i JKP "Vodovod i kanalizacija" Tuzla.

Finansiranje nekih od objekata u okviru ovog projekta, kao što je izgradnja pumpne stanice (PS) u krugu TE Tuzla, cjevovodi za transport vode od PS do postrojenja na Ceriku, te građevinski radovi na lokaciji postrojenja za prečišćavanje vode na Ceriku, realizira se iz sredstava vodoprivrednih naknada Kantona i JP "Vodno područje slivova rijeke Save" Sarajevo. Pomenuti radovi su u fazi ugovaranja (završena procedura izbora izvođača), u skladu sa dinamikom realizacije kompletnog projekta.

Izgradnja postrojenja za pripremu pitke vode sa izvorišta "Krušik", općina Kalesija, finansira se iz kredita Svjetske banke u okviru Projekta urbane infrastrukture i usluga, u kojem je nosilac aktivnosti Kanton. Prema planiranoj dinamici, u skladu sa procedurama investitora, završetak radova predviđen je za jesen 2006. godine.

Realizacija dugoročnog rješenja vodosnabdijevanja općine Teočak vrši se kroz tri faze: I i II faza radova (cjevovodi, rezervoari, pumpne stanice) finansirane su iz sredstava vodoprivrednih naknada Kantona i JP "Vodno područje slivova rijeke Save" Sarajevo, i nakon završene I faze početkom 2005. godine, ugovoreni su i započeti radovi u okviru II faze, čiji završetak se planira za proljeće 2006. godine. III fazom predviđena je izgradnja postrojenja za pripremu pitke vode koje će se finansirati iz kredita Svjetske banke u okviru Projekta urbane infrastrukture i usluga.

Prema planiranoj dinamici, u skladu sa procedurama investitora, završetak radova predviđen je za proljeće 2007. godine.

§ Priprema za realizaciju projekta prečišćavanja otpadnih voda u Živinicama u saradnji sa općinama Tuzla i Lukavac.

U septembru 2005. godine konsultanati angažirani od EBRD završili su Studiju izvodljivosti postrojenja za tretman otpadnih voda u Živinicama.

Na osnovu urađene sveobuhvatne procjene postojećeg stanja i niza planskih parametara, dat je koncept prioritarnog investicionog programa, predložen institucionalni i pravni okvir, te data finansijska procjena.

Nastavak aktivnosti na realizaciji projekta sa Evropskom bankom za rekonstrukciju i razvoj kao davaocem kredita, pretpostavlja postizanje sporazuma između, prije svega, Općina Tuzla, Živinice i Lukavac, u pogledu institucionalnog ustrojstva preduzeća koje bi, za Banku, bilo prihvatljiv partner.

§ Unapređenje vodosnabdijevanja u općinama Tuzlanskog kantona sufinansiranjem izgradnje vodovoda u mjesnim zajednicama u skladu sa utvrđenim prioritetima.

Pored prethodno pomenutih projekata izgradnje postrojenja za prečišćavanje vode Cerik – I faza, kapaciteta 300 l/s za potrebe vodosnabdijevanja općine Tuzla, te II faze projekta vodosnabdijevanja općine Teočak, tokom 2005. godine finansirani su: izgradnja sistema vodosnabdijevanja MZ Pribitkovići-Borovac i MZ Kunina-

Podgorje, općina Banovići, rekonstrukcija i dogradnja vodovodnog sistema Dubrave (donja zona), općina Živinice, vodovodni sistem MZ Mionica III, općina Gradačac, te sufinansirani radovi na izgradnji novih i sanaciji postojećih lokalnih vodovoda u općinama Gračanica, Kladanj, Kalesija, Doboj Istok.

Za realizaciju projekta vodosnabdijevanja općine Lukavac koji se finansira iz kredita Svjetske banke, obezbijeđen je dio sredstava "domaćeg" učešća.

§ Unapređenje kanalizacione infrastrukture u općinama Tuzlanskog kantona sufinansiranjem projekata izgradnje kanalizacione mreže u skladu sa utvrđenim prioritetima.

Kanalizacioni sistemi realizirani su u Požarikama, općina Gradačac, odnosno u naseljima uz akumulacije Hazna i Vidara

§ Uređenje riječnih korita, u skladu sa utvrđenim prioritetima prema, izrađenoj tehničkoj dokumentaciji.

Od zaštitnih vodoprivrednih objekata na području Kantona građenih tokom 2005. godine, treba pomenuti regulaciju rijeke Soline u Tuzli, Tinje u Srebreniku, Sapne u Sapni, Drinjače u Kladnju, Dubnice u Kalesiji, te nastavak regulacije Sokoluše u Gračanici.

Radovi na regulaciji rijeke Spreče u Živicama, na dionici od 600 m uzvodno od mosta na magistralnom putu M-17 u Malinama, ugovoreni su 2003. godine, a do juna ove godine nisu započeti zbog neriješenih imovinsko-pravnih odnosa, čije rješavanje je u nadležnosti Općine Živinice.

Do novembra 2005. godine nije izdata građevinska dozvola za predmetne radove, ponovo sa osnovnim razlogom neriješenih imovinskih odnosa, te su radovi obustavljeni, a ugovor iz 2003. godine raskinut.

Nastavak regulacionih radova na predmetnoj dionici, ali i uzvodno i nizvodno od iste, ocjenjuje se kao prioritet za naredni period, ali uz pretpostavku riješenih prethodno pomenutih pitanja od strane općine.

§ Realizacija projekta monitoringa vode na rijekama Spreča i Jala.

U skladu sa Uredbom o katastru zagađivača voda, koja je donesena u prvoj polovini 2005 godine, u toku je uspostava registra zagađivača voda na području Kantona, koja će biti završena do kraja 2005 godine.

Tokom 2005 godine vođene su aktivnosti na postavljanju automatskih vodomjernih stanica na rijekama Spreči, Gostelji, Oskovi i Turiji. Obzirom na značaj akumulacije Modrac za Tuzlanski kanton, obnova VS "Strašanj" na rijeci Spreči finansira se iz sredstava pomoći Vlade Španije za realizaciju projekta unapređenja kvaliteta voda u slivu rijeke Bosne, čiji implementator je JP za "Vodno područje slivova rijeke Save" Sarajevo.

Obnovu preostale tri vodomjerne stanice zajednički finansiraju JP za "Vodno područje slivova rijeke Save" Sarajevo, Ministarstvo poljoprivrede, šumarstva i vodoprivrede - Direkcija voda TK i Mješovito vodoprivredno preduzeće "Spreča" d.d. Tuzla. U toku je montaža opreme za VS "Strašanj" na rijeci Spreči, dok je za preostale tri VS u toku ugovaranje radova, za koje se završetak predviđa do kraja 2005 godine.

§ Uvođenje geoinformacionog sistema s ciljem registrovanja svih zagađivača vodotoka i izvorišta.

Donošenjem Uredbe o katastru zagađivača voda u prvoj polovini 2005. godine, stvorene su pretpostavke za uspostavu katastra zagađivača voda na području Tuzlanskog kantona. Pomenutom Uredbom predviđeno je godišnje ažuriranje podataka, te propisani rokovi za njihovu dostavu Ministarstvu – do 01.marta tekuće godine za prethodnu godinu.

Rok za dostavu podataka iz 2004. godine, uvažavajući vrijeme donošenja Uredbe – prva polovina 2005. godine, bio je do polovine 2005. godine.

Kako se radi o prvoj godini uspostave ovakvog registra, te neažurnosti privrednih subjekata u smislu dostave traženih podataka, očekuje se da će uspostava registra zagađivača biti završena do kraja 2005. godine.

§ Rekultivacija i pošumljavanje devastiranih površina.

Projekti realizirani tokom 2005 godine u ukupnom iznosu od 153.939,00 KM odnose se na obnove šuma pošumljavanjem i zastupljeni su na sva četiri šumsko-privredna područja na Kantonu – ŠPP Konjuh, ŠPP Sprečko, ŠPP Majevičko i ŠPP Vlaseničko.

Sporazumom između Kantonalne uprave za šumarstvo i JP "Šume TK" Kladanj o regulisanju prava i obaveza u vezi sa radom čuvarske službe u državnim šumama, izvršeno je plaćanje iznosa od 767.237,00 KM u korist JP "Šume TK" Kladanj, što iznosi 30% ukupnih troškova nastalih obavljanjem poslova čuvanja šuma u periodu od 01.06.2002. godine do 31.12.2004. godine.

Pomenutim sporazumom, evidentirani su troškovi nastali obavljanjem poslova čuvanja šuma za period I-VI 2005 godine, ali nije izvršena finansijska realizacija istih.

Na ime pokrivanja troškova nastalih obavljanjem poslova čuvanja privatnih šuma, u skladu sa odgovarajućim odlukama, odnosno ugovorima, izvršena je finansijska realizacija u iznosu od 300.000,00 KM od čega 53.000,00 za opremanje čuvarske službe, a u korist JP "Šume TK" Kladanj.

§ Pojačana prevencija, suzbijanje i iskorjenjivanje zaraznih bolesti životinja.

U budžetu Tuzlanskog kantona su obezbijeđena sredstva u iznosu od 200.000,00 KM za suzbijanje i iskorjenjivanje zaraznih bolesti kod životinja koja su realizovana sa oko 70% , dok je za preostali dio sredstava realizacija u toku.

Potrebno je istaći da je izdvajanje sredstava za ovu namjenu opravdano, obzirom da je na terenu relativno dobra epizootička situacija. Obuhvaćeno je ispitivanje većeg broja grla na zarazne bolesti, što je kao rezultat imalo mali broj pozitivnih grla.

RAD I SOCIJALNA POLITIKA

§ *Uspostava jedinstvene baze podataka i transfer sredstava iz trezora prema korisnicima za osnovne oblike socijalne zaštite.*

Resorno Ministarstvo je uspostavilo jedinstvenu bazu korisnika socijalne zaštite, posebno osnovnih oblika koji se moraju isplaćivati u punom iznosu sukladno Zakonu o socijalnoj zaštiti, zaštiti civilnih žrtava rata i zaštiti porodice sa djecom.

Isto tako temeljem zacrtanih smjernica uredili smo jedinstven način isplate uspostavljenih prava putem pošte do krajnjeg korisnika čime se postigla efikasnost u ostvarivanju prava, ali su se i oslobodili mjesno nadležni centri za socijalni rad administriranja, a u korist stručnog rada na otkrivanju i prevenciji nastajanja stanja socijalnih potreba građana. Uradili smo provedbene akte u skladu sa Zakonom i vršimo stalni nadzor nad zakonitošću uspostavljenih prava i posrednu reviziju kroz dostavljenu dokumentaciju za novouspostavljena prava.

Na osnovu uvida u dokumentaciju dolazimo do spoznaja o nepravilnostima i vršimo neposredan nadzor u ustanovama socijalne zaštite.

Jedinstvena baza podataka i transfer sredstava prema korisnicima putem pošte, omogućili su kvalitetniji rad u centrima u svezi usluga socijalnog rada.

Urađena je cjelovita analiza stanja u oblasti socijalne i dječje zaštite koja je prihvaćena na Vladi i Skupštini Tuzlanskog kantona.

Analizom je posebno obrađena dječja zaštita, na Kantonu temeljem obaveza iz Akcionog državnog plana za djecu (period 2002 - 2010. godine). Postignut je napredak u porodičnom smještaju i stalni nadzor u institucijama socijalne zaštite kao privremenom obliku zbrinjavanja djece do adekvatnog oblika smještaja kroz usvojenje (potpuno ili nepotpuno) i smještaj u porodicu kao bolji oblik odgoja i odrastanja.

Naš model je prepoznat na nivou F BiH i šire i podržan je od USAID-a kao rješenje koje treba da se širi na postore BiH.

Uradili smo i prateće procedure procjene podobnosti porodica i porodičnog smještaja uopće. S obzirom na pristup jedinstvenom rješenju socijalne i dječje zaštite na nivou F BiH, osnivanje Kantonalnog Zavoda za socijalnu i dječju zaštitu, koji je planiran u ovoj godini, smatramo ishitrenim rješenjem i slažemo se da se odloži za naredni period poštujući državne prijedloge u socijalnoj i dječjoj zaštiti.

§ *Inspekcijskim kontrolama i nadzorom legalizovati rad 1000 novih uposlenika.*

Inspektorat rada u programskim aktivnostima za 2005. godinu imao je za cilj kontrole primjene Zakona o radu, općih i granskih kolektivnih ugovora, kao i Zakona o zaštiti na radu i podzakonskih akata vezano za segment rada i zaštite na radu.

U periodu 01.01 - 31.10.2005. godine Inspektorat je u potpunosti izvršio ciljeve i programske zadatke.

Inspekcija za oblast radnih odnosa i zaštite na radu je u izvještajnom periodu vršila inspekcijske nadzore kod pravnih i fizičkih lica koji se bave mašinskom, elektro, građevinskom, drvo prerađivačkom, trgovinskom i drugom djelatnošću.

Inspektori iz oblasti zaštite na radu u izvještajnom periodu su takođe vršili uviđaje zbog težih povreda na radu kojih je bilo ukupno 18. U odnosu na isti period 2004. godine više ih je bilo za 6, ali na sreću u odnosu na isti period 2004. godine, kada je bilo 6 smrtnih slučajeva, ove godine nije bio ni jedan.

Kad je u pitanju broj pregleda inspektori rada izvršili su ukupno 5730 kontrola. Zbog utvrđenih nedostataka izdato je 299 rješenja o otklanjanju nedostataka, 10 rješenja o zabrani rada i podnijeto je 90 prijava za pokretanje prekršajnog postupka.

Inspektori za oblast radnih odnosa, a povremeno i inspektori za oblast zaštite na radu kontinuirano su vršili kontrole radno angažovanih lica i u svim slučajevima, gdje su zatekli da poslodavci sa tim licima nisu zaključili pojedinačne ugovore o radu, nalagali su poslodavcima da to učine i da ih prijave Fondu penzijskog, invalidskog i zdravstvenog osiguranja.

Kontrolnim pregledima utvrđeno je da su u najvećem broju slučajeva poslodavci postupili po nalogu inspektora, tako da je u periodu 01.01 - 31.10.2005. godine legalizovan rad, tj. da je prijavljeno Fondu PIO i Zavodu za zdravstveno osiguranje Tuzlanskog kantona 852 lica, smatramo da ćemo do kraja godine uspjeti legalizovati rad 1000 uposlenika kako je to predviđeno ciljevima i politikom Tuzlanskog kantona za 2005. godinu.

BORAČKO - INVALIDSKA ZAŠTITA

§ *Izrada dugoročnog programa stambenog zbrinjavanja boračke populacije Tuzlanskog kantona.*

Izrada dugoročnog Programa stambenog zbrinjavanja boračke populacije TK je okončana krajem mjeseca oktobra, te nakon usaglašavanja sa boračkim organizacijama Program je upućen u proceduru usvajanja.

§ *Realizacija programa bržeg zapošljavanja boraca i članova njihovih porodica.*

U vezi sa realizacijom programa bržeg zapošljavanja boraca i članova njihovih porodica, Vlada Tuzlanskog kantona, na sjednici održanoj 12.10.2005.godine, razmatrala je i usvojila Informaciju o realizaciji Projekta kreditiranja u funkciji bržeg zapošljavanja boračke populacije.

U vezi sa navedenim, tom prilikom, konstatovano je aktivno učešće u realizaciji ovog projekta, sa naglaskom na daljem promovisanju ove kreditne linije obzirom na ne iskorištena sredstva. U skladu sa poslednjom informacijom Kreditnog odbora Tuzlanske banke d.d. Tuzla do sada 21 aplikant nije ispunio kriterije Javnog poziva, 4 aplikanta se ne uklapaju u namjenu dok je za 4 aplikanta donesena pozitivna odluka o odobravanju sredstava, pri čemu je plasirano 118.000,00 KM i zaposleno 23 radnika.

§ *Rješavanje stambenog problema ratnih vojnih invalida, paraplegičara, u skladu sa njihovim zdravstvenim potrebama i nabavka motornih invalidskih kolica.*

Programom stambenog zbrinjavanja ratnih vojnih invalida 100% I grupe invalidnosti (osoba sa paraplegijom), na koji je Vlada TK dala svoju saglasnost, u tekućoj godini riješeno je 15 RVI koji su ispunjavali kriterije za pomoć.

Resorno ministarstvo namjerava da ovu aktivnost nastavi i u narednoj godini i pruži odgovarajuću potrebnu pomoć u okviru planova i raspoloživih sredstava.

§ Okončanje postupka zakonske revizije rješenja lične i porodične invalidnine za 19.000 korisnika boračko-invalidske zaštite.

Shodno odredbama Zakona o pravima branilaca i članova njihovih porodica u 2005. godini je u Ministarstvu započeo postupak zakonske revizije rješenja izdatih u prvostepenom upravnom postupku za korisnike lične i porodične invalidnine.

Odredbama Zakona je predviđeno da se u toku 2005. godine okonča postupak zakonske revizije za sve korisnike porodične invalidnine kao i za korisnike lične invalidnine od I – do VII grupe invaliditeta.

U određenom broju opština, koje su ispoštovale zakonski rok i donijele prvostepena rješenja do 31.12.2004. godine postupak zakonske revizije će biti ispoštovan, dok se za opštine koje još uvijek nisu donijele prvostepena rješenja, postupak zakonske revizije bi mogao doći u pitanje.

TRGOVINA, TURIZAM I SAOBRAĆAJ

§ U saradnji sa federalnim Ministarstvom prometa i komunikacija i federalnom Direkcijom cesta raditi na realizaciji nekoliko projekata razvoja saobraćajne infrastrukture na području Tuzlanskog kantona i to:

- Izgradnja autoputa Tuzla-Orašje.

Vlada TK je još u 2000 godini odobrila sredstva u iznosu od 221.100,00 KM za izradu preinvesticione dokumentacije autoputa Tuzla-rijeka Sava.

Iz sredstava koje je izdvojila Vlada TK izrađena je Saobraćajna studija, Studija izbora trase autoputa i Preliminarna studija opravdanosti izgradnje autoputa Tuzla-rijeka Sava. Skupština TK je 31.01.2001.godine prihvatila Informaciju o svim aktivnostima izgradnje autoputa. Takođe, Skupština Posavske županije i Skupština Brčko Distrikta je prihvatila i podržala sve aktivnosti oko autoputa

Resorno ministarstvo je sprovedelo Javni poziv za predkvalifikaciju 2002.godine na koji su se javile zainteresovane kompanije koje su ispunile uslove tražene javnim pozivom.

Nakon toga raspisan je Javni poziv za prikupljanje ponuda za izradu tenderske dokumentacije za izgradnju autoputa Tuzla-rijeka Sava po DBOT (desing build operate transfer) sistemu.U međuvremenu je i odabrana konsultantska kuća za izradu tenderske dokumentacije .

Nakon svih sprovedenih aktivnosti Vlade i Skupštine TK, a na prijedlog Federalnog Ministra prometa i komunikacija, projekat se prenio u nadležnost federalnog ministarstva .

Vlada Federacije BiH je 23.11.2003.godine donijela zaključak da se projekat izgradnje autoputa Tuzla-rijeka Sava proglasi projektom od strateškog značaja za Federaciju BiH.

Istim zaključkom je zadužila Federalno ministarstvo prometa i komunikacija kao nosioca narednih faza pripreme dokumentacije za izgradnju projekta Tuzla-rijeka Sava u saradnji sa drugim ministarstvima, kantonima i institucijama.

Resorno ministarstvo je sve projekte i dokumentaciju oko autoputa koje je posjedovalo, predalo službeno Direkciji cesta FBiH radi nastavka započetih aktivnosti .

Vlada TK i Ministarstvo trgovine, turizma i saobraćaja je u saradnji sa Federalnim ministrom prometa i komunikacija i Direkcijom za ceste FBiH u 2005.godini kontinuirano radila na pripremi potrebne dokumentacije u vezi autoputa Tuzla-rijeka Sava.

Na prijedlog Federalnog ministarstva Vlada FBiH je odobrila sredstva u iznosu od 2.500.000,00 KM za nastavak priprema za izgradnju autoputa Tuzla-rijeka Sava (izrada Studije zaštite okoliša i dr) , te naložila da se intenzivno radi na projektnoj dokumentaciji vezanoj za izgradnju i modernizaciju ceste Tuzla-Sarajevo

- ***Rekonstrukcija ceste M-18 Tuzla-Sarajevo, dionica Šićki Brod Jošanica(L=108,00 km).***

U toku 2005 godine održano je više sastanaka sa predstavnicima Federalnog Ministarstva prometa i komunikacija-Direkcija cesta FBiH na kojima je razmatrana mogućnost izgradnje i modernizacije ceste Tuzla-Sarajevo, odnosno rješenje saobraćajne raskrsnice na Šićkom Brodu.

Direkcija cesta FBiH je u 2005 godini ugovorila izradu glavnog projekta rekonstrukcije, odnosno nadogradnje puta Tuzla-Sarajevo.

U toku je izrada glavnog projekta za dionicu Kladanj-Podpaklenik dužine 10,7 km. Na ovoj dionici znatno se napušta postojeća cesta pri čemu se planira na prevoju Karaula izraditi tunel dužine 860 m, a zatim se trasa nastavlja dionicom Dubokog Potoka i Potoka Blizanci i spušta do Podpaklenika.

Na ovaj način se postojeća trasa skraćuje za cca 2,5 km. Idejni projekat je završen i ugovoren je glavni projekat koji košta 345.705,00 KM, a koji bi trebao biti završen do kraja ove godine.

Takođe, završen je i glavni projekat za dionicu Podpaklenik-Olovo dužine 8,0 km za koji je odobreno 274.100,00 KM. U toku je revizija ovog projekta.

- ***Rekonstrukcija petlje Šićki brod i rekonstrukcija i izgradnja saobraćajnice Kreka – Šićki Brod.***

Ovaj projekat je projekat srednjoročnog tipa i planirano je da se realizuje u narednih 5 godina.

U 2004 godini u sklopu Glavnog projekta dionice Šićki Brod – Drežnik urađen je i Glavni projekat rekonstrukcije petlje Šićki Brod.

U sklopu ovog projekta predviđena je dogradnja još jednog kolovoza sa razdjelnim pojasom pri čemu je potrebno uraditi i Elaborat eksproprijacije.

U ovaj projekat je uključena i Općina Tuzla sa svojim službama.

- ***Rekonstrukcija raskrsnice na magistralnom putu M-4 Tuzla – Doboj (ulaz u Lukavac).***

Ovaj projekat je projekat srednjoročnog tipa i planirano je da se realizuje u narednom periodu .

Ukupna vrijednost projekta je oko 700.000,00 KM. Projekat je od strateškog značaja za Tuzlanski kanton, a za implementaciju je zadužena Federalna Direkcija cesta.

Resorno ministarstvo je iniciralo i dostavilo zahtjev da se ovaj projekat uvrsti u Plan rada Direkcije cesta FBiH za 2006/07 godinu.

- ***Rekonstrukcija raskrsnice na magistralnom putu M – 18 Tuzla – Orašje (Ormanica – skretanje za općinu Gradačac).***

Ovaj projekat je planirano je da se realizuje u narednom periodu. Projekat je od strateškog značaja za Tuzlanski kanton, a za implementaciju je zadužena Federalna Direkcija cesta.

Resorno ministarstvo je iniciralo i dostavilo zahtjev da se ovaj projekat uvrsti u Plan rada Direkcije cesta FBiH za 2006/7 godinu.

- ***Izgradnja pješačkih staza na dionicama magistralnih cesta koje prolaze kroz naseljena mjesta (prolaz kroz Dobrnju, prolaz kroz Đurđevik, Husino, Orahovica – Gračanica i dr.),***

Ovo je takođe dugoročni strateški projekat Tuzlanskog kantona koji se planira realizovati uz pomoć Federalnog ministarstva prometa i komunikacija.

U toku 2005 godine urađeno je nekoliko pješačkih staza u naselju Dobrinja – Općina Tuzla i Pribavi – Općina Gračanica pored magistralnih puteva.

U narednih 3 do 4 godine se planira realizacija ovog projekta.

§ *Regulisati taxi prijevoz na području Tuzlanskog kantona,*

Resorno ministarstvo svakodnevno vrši nadzor nad radom taksi prijevoza i preduzima mjere na rješavanju svih tekućih problema u taksi prijevozu .

Inspekcija je u svom radu donijela 301 Rješenje o otklanjanju nedostataka, 179 Rješenje o zabrani rada, oduzeto 406 predmeta (taksi oznaka, regist. oznaka i td.) , podnešena 921 prekršajna prijava nadležnim sudovima , te je pokrenula 5 postupaka zbog učinjenog privrednog prestupa.

Donošenjem novog Zakona o prijevozu od strane federalnog Parlamenta stvoriti će se mogućnosti za efikasnije rješavanje nelegalnog taksi prijevoza.

Očekujemo donošenje ovog Zakona do kraja godine.

§ Pojačan inspekcijski nadzor na suzbijanju bespravnog rada, kontroli kvaliteta proizvoda i zaštiti potrošača i dr.

U toku 2005 godine kantonalna inspekcija je preventivno i represivno preduzimala mjere na suzbijanju bespravnog rada , praćenju tržišta i zaštiti potrošača.

Uz koordiniranu aktivnost sa drugim inspekcijama, inspekcije koje su u nadležnosti Ministarstva (tržišna, turističko-ugostiteljska, saobraćajna i putna) kontinuirano su vršile nadzor i primjenu propisa u cilju zakonskog poslovanja pravnih i fizičkih lica u oblasti proizvodnje, prometa roba i prometa usluga.

Postignuti su značajni rezultati u eliminisanju nelegalnog prometa roba, usluga na našem Kantonu, nelegalnog prijevoza putnika čime su postignuti značajni efekti, posebno u finansijskom pogledu koji se ogleda u povećanju prihoda Budžeta kao i izvan budžetskih fondova.

U saradnji sa Savjetom potrošača, uključivanjem u projekat EU o zaštiti potrošača vodile su se odgovarajuće aktivnosti na zaštit potrošača u prometu roba i usluga na Tuzlanskom Kantonu.

§ Nastaviti sa unapređenjem saobraćaja sa Aerodroma Tuzla.

Vlada Tuzlanskog kantona i resorno ministarstvo su izvršili imenovanje nadzornog odbora u skladu sa zakonom iz čega su vrlo brzo proistekli pozitivni rezultati u poslovanju Aerodroma.

U ovoj godini Aerodrom Tuzla je ostvario značajne finansijske rezultate, te u toku prestanka rada Sarajevskog aerodroma zbog rekonstrukcije, preuzeo dio avio saobraćaja i pokazao da može zadovoljiti sve zahtjeve putnika u putničkom i kargo prijevozu našeg Kantona i cijele regije.

Postignuti su značajni rezultati u poslovanju koji se ogledaju u pozitivnim rezultatima poslovanja, kao i ostvarenju vlastitih prihoda, investiranju u nabavku opreme, izgradnju građevinskih objekata i dr.

§ Dovršiti izgradnju ski lifta u općini Kladanj.

Vezano za realizaciju ovog projekta možemo konstatovati sljedeće:

- nakon ispoštovane zakonske procedure vezano za nabavku rabljenog ski lifta općina Kladanj je izvršila izbor najpovoljnijeg ponuđača, metodom neposredne pogodbe, te potpisala ugovor o nabavci, isporuci i nadzoru montaže ski lifta sa preduzećem "Ozon" Travnik.
- isporučioc opreme je općini Kladanj isporučio kompletan ski lift, odnosno opremu neophodnu za normalno funkcionisanje ski lifta
- općini Kladanj je uručen i projekat neophodan za montažu opreme, ali je isti vraćen isporučiocu radi prevođenja i neophodne revizije, o čemu je postignuta saglasnost ugovorenih strana
- općina Kladanj je još u postupku rješavanja imovinsko pravnih odnosa vezano za ski stazu, naime vodi se sudski spor sa vlasnicima tri zemljišne parcela preko kojih ide instalacija ski lifta i sama ski staza

- općina Kladanj je raspisala tender i izvršila izbor najpovoljnijeg ponuđača za izvođenje neophodnih građevinskih radova kako bi se stekli odgovarajući uslovi za montažu opreme i uređenje same ski staze.

Iz gore navedenih aktivnosti moguće je utvrditi da su se stekli skoro svi neophodni uslovi kako bi aktivnosti na instaliranju ski opreme mogli početi.

Aktivnosti na realizaciji ovog projekta provodi općina Kladnj, a resorno ministarstvo uglavnom prati realizaciju projekta i aktivno se uključuje u cilju rješavanja određenih problema do kojih je dolazilo u realizaciji samog projekta.

§ Sačiniti program finansijske konsolidacije Direkcije za puteve Tuzlanskog kantona.

U saradnji sa povjericima Direkcije za puteve TK (izvođačima radova, komercijalnim Bankama) izvršeno je reprogramiranje obaveza Direkcije čime su stvoreni preduslovi za realizaciju planiranih aktivnosti Direkcije za puteve TK u 2005 godini.

**Bosna i Hercegovina
Federacija Bosne i Hercegovine
Tuzlanski kanton
VLADA**

**PREMIJER KANTONA
Bajazit Jašarević**

**Broj: 02/1-
Tuzla, 13.12.2005.godine**